

Maka

Givimayeta

Nufunufu nofe o miki viginiwina Yeisu yana mudadava keta yana visawavenena fasisiyai. Nufunufu nofe kana toviginawa o muka kana wawa ita iyaveita atu nauna tovitumaġana kasi tovikeltanuneina si vivisawavenena o Maka i viginiwiya. Maka o muka tanake Yeisu yana tonowana sine-siyai, atu tonuwatasuyasuya si vitumaġana Maka Fita nukusi Noma si fakwa keta Fita i nusifufuwiya Yeisu yana mudadava keta yana visawavenena fasisiyai. Eketa Maka nusifufusima i viginiwiya me Noma tovitumaġana nenesiyai i ovivitisiya be sina sanamaniya Yeisu aitevana.

Bwadubwadu naumokena viginiwa nofe sinenei i iyavita o biga dewadewana Yeisu Togifafafana Gigibokeinana Guyau Natuna fasinei. Nufunufu nofe sinenei tana kitiya Yeisu na yana fiwana be iba matatafunina savivinisiya. Noko nenei tana kitiya yana visawavenena namoġa nenesiyai, kanunu goyosi i vikikinomanisiya, kasi katona i givibwina eketa yasi fufunagoyo i vinuwateweina. Maka i viginiwa nakasina Yeisu yana savivina fasinei atu muka ita viginiwa nakasina yana visawavenena fasinei. I visawavenita namaise Yeisu yana mate ogonaġanaġai be namoġa matatafusi i gifafafanisiya keta namaise Guyau mateyai i sinaviyawasa-savaviniya.

Biga dewadewana kana kafa viuġu. (1:1-13)

Yeisu yana mudadava Ganini sinenei. (1:14—9:50)
 Ganini nenei tu i niya Yenusanema. (10:1-52)
 Wiki kana kafa nusafu Yenusanema sinenei. (11:1—15:47)
 Yeisu yana misini-savavineina. (16:1-18)
 Yeisu i nikikinomana keta i vaneya abamai. (16:9-20)

Yoni Togivibutabuta Ke'ta I Gidewadewiya Yeisu Fasinei

Madiu 3:1-12, Nuke 3:1-18, Yoni 1:19-28

¹ Nofe biga dewadewana kana kafa viuḡu Guyau natuna fasinei, tanake Yeisu Togifafafana Gigi-bokeinana.

² Tova manatuwaina Guyau yana tomatakawa Aiseya i viginiwiya maise,

“Guyau i bwaduwa, ‘Nauna yaku tomatakawa ana visimeiya kunauḡu
 be ya ke’ta ina menaniya.’

³ Tanake kayona i bwaubwauwa wanakikaoḡowai i bwadubwaduwa,

Ke’ta kwa menaniya Tuveka yana nemifasinei,
 yana ke’ta kwa nudawaniniyei.””

⁴ Eketa nofe tomatakawanama Yoni i nemiya namoḡa i givibutibisiya wanakikaoḡowai yota Guyau sifufuna namoḡa nenesiyai i numamaniya, “Kwa ugevinaimi yami go’yona nenesiyai be Guyau ina vinuwateweimiya. Ana givibutibutimiya be ita visawavenena, kwami naki i kavinimiya yami go’yona nenesiyai.” ⁵ Eketa namoḡa

matatafusi si fakwafakwa Yudiya kawakawana sinenei be Yenusanema menana nakasina sinenei, si kikinomana Yoni sina vaneneiya. Tovanama yasi go'yna si fonayauwa, Yonidani ukowai i givibutibutisiya. ⁶ Yoni kana nuya kameni utuutuna i kotoniya, yota kana wakina niniwasininei kikimetanina o kikifufunina yomuyomu kwafinina nenei. Kana kabwaga o gonofa keta makawa.

⁷ Namoga i iyavisiya i bwaduwa, “Munikuwai namoga tamokāga i nenemiya o fifiwanamokena yo iyau. Iyau muka kaku nufota be ana okodu kana kaevatakutakuna kasi unava ana yausi. ⁸ A gigivibutibutimiya ukowa nenei atu tanake ina givibutibutimiya Kanunu Tafutafuna nenei.”

*Yoni Yeisu I Givibutabutiya
Madiu 3:13-17, Nuke 3:21-22*

⁹ Noko tovanama nenei Ganini kawakawana sinenei menana Nasaneti nenei Yeisu i misiniya eketa i nemiya Yoni nenei, eketa Yoni Yeisu i givibutabutiya Yonidani ukowai. ¹⁰ Tovanama Yeisu i kakanakasiya ukowa sinenei, muka mwanenena i kitija abama i kawiya eketa Guyau Kanununa vitana bunebune maise i sobunemiya nenei. ¹¹ Eketa kayokayo abamei i nusifufuwa i bwaduwa, “Kwāga o Iyau natukatekateku. Yaku sebobo nakatamokena nenewe.”

*Seitani Yeisu I Anuvanuviya
Madiu 4:1-11, Nuke 4:1-13*

1:6 2 Tufomu 1:8 **1:11** Kabikona 22:2, Same 2:7, Aiseya 42:1,
Madiu 3:17, 12:18, Maka 9:7, Nuke 3:22

12 Muka mwanenena Guyau Kanununa Yeisu i nōgokawawiya wanakikaōgowai. **13** Eketa kuyadayada 40 nokomai i fakwa eatu Seitani i anuwanuviya Yeisu be ita go'yon. Yomuyomuwawanawanaki nukusi si fakwa kabāganama nenei atu Guyau kana kaetōga abamei si kitavikaviniya.

*Yeisu Kana Tomuniyeina Naumokena
Madiu 4:12-22, Nuke 4:14-15, 5:1-11*

14 Tufomu Enoda Anitifasi deniyai Yoni i tenefotiya muninei, Yeisu i niya kawakawana Ganini nenei Guyau yana biga dewadewana i yaugeyaniya namōga nenesiyai. **15** I bwaduwa, “Nofe tova Guyau yana kawasasa vivinuwadadaneinana i nemiya! Guyau yana kafa visime i niketamwakufwa. Yami go'yon nenesiyai kwa ugevinaimi be biga dewadewana kwa vitumāganei.”

16 Eketa kuyadayada tamokāga Yeisu Ganini tobu nenei kwadewai i fanafana atu tofanufa nasi nuwa i kitisiya, Saimoni keta taina Anideneya, tobu nenei kanevatu si neneneiya. **17** Eketa i iyavisiya i bwaduwa, “Kwa muniyeiku be ana visawavenimiya namōga kasi tofanufa.” **18** Muka mwanenena yasi kanevatu si dawana atu si muniyya.

19 Simokāgamoka i fana i niya, Sebedi natunatuna Yemesa keta Yoni i kitisiya yasi waka sinenei yasi kanevatu si nunubwatabwatata. **20** Tovanama i wenisiya kana muniyeina fasinei, amasi Sebedi yana tobunanige na fatasi nukusi waka sinenei si venumakanovisiya atu si muniyya.

*Yeisu Kanunu Goyona I Nukakiya Namōga Nenei
Nuke 4:31-37*

21 Yeisu kana tomuniyeina nukusi si niya Kafenaumi menana nakasinei. Tovanama kuyadayada Sabati nenei i kanasuna numa kafa yokoyoko sinenei, eketa i vibutuwa Guyau fonana i visawavenena namōga nenesiyai.

22 I vivisawavenena naki maisemoka tamo aitevana fakinina muka maise Mosese yana visime kana tovisawavenena, na nenei keta namōga si mayāga yana visawavenena nenei.

23 Yeisu i vivisawavenena numa kafa yokoyoko sinenei eatu tovanama nenei namōga tamokāga kanunu goyona i nuwafiya, i fina i bwaduwa,

24 “Aviyavana tamo ya nuwanuwa kima fasikiyiay Yeisu tene Nasaneti? Omasi ku nemiya kima kuna nuyaunikiya? Iyau a sanamaniya kwāga aitevana, kwāga o Guyau yana Namōga Tafutafuu!”

25 Yeisu i kanamaifata atu i bwaduwa, “I kanoveu! Namōga ku gionovei.” **26** Eketa kanunu goyona i tatakwayana, namōga i sinanewanewiya keta i gionoviya.

27 Namōga matatafusi si mayāga venemokena eketa si vikanunutoniya si bwaduwa, “Ava o nofe! Nofe visawavenena kiouna yota fakinina. Tumadama yo kanunu goyosi i vivisimeysi eketa fonana si munimuniiyal!” **28** Kakimokimokima tu Yeisu bigana i geyana eketa i venutamatamana Ganini kawakawana kana matatafu i gikafufuya.

*Yeisu Namōga Yagwanisi I Givibwina
Madiu 8:14-17, Nuke 4:38-41*

29 Tovanama numa kafa yokoyoko si teweiya, Yemesa keta Yoni nukusi si niya Saimoni na taina Anideneya yasi numai. **30** Saimoni nawana gumayogu si vinafeyana keta kiviyai si matamataveya eketa fasisiyai muka mwanenena atu si iyavefotefotiya. **31** Eketa i kanasuna i niya nenesiyai, nimasiyai i ova eketa i sinatowamisiniisiya. Na tovanama nenei nafeyana tofwasiyai i kaniniya eketa gumayogusima kabwaga si suniniya Yeisu kana tomuniyeina nukusi fasisiyai.

32 Eketa kana navinavi vanavanasonu muninei,* namoغا yasi tovisafwavinaغا keta yota tasike aviyaonana kanunu goyosi si nuwafisiya, si nemina Yeisu nenei. **33** Menana noko kana matatafu si yokowa numanama wasiketanei. **34** Eketa sabu kasi visafwavinaغا tunisitunisi nenesiyai i givibwina keta yota namoغا yagwanisi sininisiyai kanunu goyosi i nukakisiya. Atu kanunu goyosi o sanasanamanisi tanake Guyau Natuna na fasinei muka ita sawateweysi be sina nusifufu.†

*Yeisu Ganini I Numamana
Nuke 4:42-44*

35 Tovawedanai Yeisu i towamisiniya, numa i teweiya keta i niya kabага nunukamumunina

* **1:32** Vanavanasonu muninei kana givina vitana Sabati naki i kakaviya. Fiyaو Diu yasi Sabati i vibutuwa Fanaidei vanavanasonuwai keta i kakaviya Satadei vanavanasonuwai.

† **1:34** Yeisu naki i sanamaniya taki kanunu goyosi ina sawateweysiya be sina bwadukikinomana vitana Yeisu tanake Togifafafana Gigibokeinana, nao namoغا sina kamanemaniya be ina vikaimatana tonuaviya fasisiyai, namaise yawane i kitakitafota kasi togifafafana fasinei, e maise Yoni 6:15.

nenei eketa nokomai i kawakawanunuwa. ³⁶ Atu Saimoni unaunana nukusi si niya si nunuwasiya. ³⁷ Tovanama si nisaiya, si iyaviya si bwaduwa, “Namōga matatafusi si nunuwasiwa.”

³⁸ I bwaduviyewa i bwaduwa, “Ta nai namai tunisi menana ketamwakufwai ebe Guyau fonana yota a yaugeyaniya nenesiyai. Nofe yaku ūgunama fasinei a nemiya.” ³⁹ Nofe fasinei, Ganini kana matatafu i fanakwaniuwiya eketa Guyau fonana i yaugeyaniya yasi numa kafa yokoyoko sinesiyai yota namōga yagwanisi sininisiyai kanunu goyosi i nukakisiya.

*Yeisu Namoḡa Gosagosawina I Givibwiniya
Madiu 8:1-4, Nuke 5:12-16*

⁴⁰ Tova tamokāga namōga kwafinina gosagosawina i nemiya Yeisu nenei i fekuwa kaetutunei eketa i kamanemaniya i bwaduwa, “Ae, taki nuwanuwau maise, kuta givibwinikuwa be ata eyaeya.”[‡]

⁴¹ Yeisu na yana sineganigani nimana i tuniya keta namōga tofwanei i teniya eketa i bwaduwa, “Ika, Iyau nuwanuwaku. Ku eyaeya!” ⁴² Eketa kakimokimokima tu kwafinina kana gosawa i kakaviya eketa i eyaeya-savaviniya. ⁴³⁻⁴⁴ Eketa Yeisu

1:39 Madiu 4:23, 9:35 [‡] **1:40** Fiyao Diu yasi visime nenei, namōga kwafinina gosagosawina tanake muka eyaeyana eketa nunuteweineinana. Fiyao Diu muka kasi sawateweineina be nofe visafwavinaganama sina givikaviniya. Namoḡa gosagosawisi muka kasi sawateweineina be sina kodukodu Numa Kodukodu nenei yota muka menana sinenei sina fakwa. Na fasinei taki namōga gosagosawina ina bwina, nao tanake naki i eyaeya-savaviniya. Yota Guyau ina visawadewedewiya eketa kana nufota be namōga nukusi sina fakwa keta sina kodukodu Numa Kodukodu sinenei.

bwadu fifiwanina nenei i iyaviya i bwaduwa, “Nofe tova ku nai eatu muka tamo aitevana kuna iyavei nofe ibanama fasinei. Dawaniniina kuna niya eketa tauğu kuna visawaveniwa tovibwanaose nenei. Eketa ku bwina fasinei Moses yana visime maise, vibwanaose kana ketaketai kuna saviviniya ebe ita vikafakita sabu nenesiyai vitana naki ku eyaeya.”§

⁴⁵ Atu Yeisu yana bwadu muka ita muniyei keta i kikinomana namoğa nenesiyai i eyowiya aviyava i kikinomana tauna nenei fasinei. Yeisu na yana uğunama fasinei muka kana nufota be namoğa matasiyai ina kanasuna menana nakasina sinenei, atu i fakwa kabagña nunukamumunisi nenesiyai. Eatu menana matatafunu nenesiyai namoğa si nemiya nenei.

2

*Yeisu Namoğa Tanaina Matematena
I Gidewadewiya*

Madiu 9:1-8, Nuke 5:17-26

¹ Kuyadayada muka yagwanina muninei Yeisu kana tomuniyeina nukusi si makavinisiya Kafenaumi. Namoğa si biganowana vitana i nemiya tauna yana menanai, ² eketa yagwanisi si yokowa nokomai. Na fasinei muka tamo kawasasa numa sinenei o ketakawana kafakainei. Eatu Yeisu Guyau fonana i numamaniya nenesiyai.
³ Namoğa nasi nufunina, namoğa tanaina

§ 1:43-44 Tovibwanaose namoğa yasi kavenenakaoğō ina vibwanaoseiya fasisiyai Guyau nenei, nofe ina visawavenena naki venemokena namoğa kana gosawa i kakaviya. (Visime Tafu 14:1-32)

matematena na sitana si uniya keta si nemiya nenei.⁴ Yoko nakasina si teneftifotisiya eketa muka kasi fata namoñanama sina nemiyei Yeisu nenei. Na fasinei mananai kaevaavaäga nenei si vaneiya kudukudu wai keta si tananabuya namai Yeisu i fakwafakwa nenei. Eketa tovanama kudukudu si tananabuya muninei, na sitana si otanowiya unava nenei eketa i sobuwa Yeisu naunie. ⁵ Tovanama Yeisu i kitiya namoña nasi nufunina yasi vitumañana, namoña tanaina matematena i iyaviya i bwaduwa, “Natuku, ya go'yon a vinuwateweisiya.”

⁶ Tunisi Diu yasi visime kana tovisawavenena nokomai si nunuvitoña. Tututausi nuwasinesiyai si bwaduwa, ⁷ “Au, naki Guyauña kana nufota go'yon a ina vinuwateweina. Ava uguna nofe namoña nokomaise i nunusifufu eyo i bwadubwadu-tafakaikokona Guyau nenei!”

⁸ Eatu yasi vinuwadadanasma Yeisu waniya i venusanamaniya eketa i iyavisiya i bwaduwa, “Ava fasinei nanemaise kwa vivinuwadadana nuwafoumiyai?” ⁹ Avi bwadubwadu o meyameyanina namoña tanaina matematena nenei, ‘Ya go'yon a vinuwateweisiya’ o ‘Ku misini ka sita ku uni be ku nidadana?’ ¹⁰ Eatu kwata sanamaniya vitana Iyau Namoña Natuna na yaku visime fakinina kana fata go'yon ana vinuwateweina fwayafwaya etanei yota namoña ana givibwina.” Eketa namoña tanaina matematena i iyaviya i bwaduwa, ¹¹ “Neneweua bwadubwaduwa, ku misini! Ka sita ku uni be ku nai numai!”

¹² Tovanama nenei namoña i misiniya, kana

sita i uniya keta namoġa sabu matasiyai i niya. Matatafusi si mayaġa eketa Guyau si daviya si bwaduwa, “Mukamokena tamo tova ibanama maise tata kitai!”

Yeisu Nebi I Bwauwiya

Madiu 9:9-13, Nuke 5:27-32

¹³ Yeisu kana tomuniyeina nukusi yota menana Kafenaumi si teweiya atu si niya Ganini tobu kafakainei. Sabu nakasina si nemiya nenei eketa Guyau fonana i visawavenena nenesiyai. ¹⁴ Kabegona i vaniya, Anafasi natuna kana wava Nebi i kitija i nunuvitoġa yana kafa savivina nenei gabana i nunuvemuvemuwa Noma gabemani fasisiyai. Eketa Yeisu i iyaviya i bwaduwa, “Ku muniyeiku be ku vitomuniya.” Nebi i misiniya keta i muniiya.

¹⁵ Noko muninei, Yeisu Nebi yana numai i vivianonaviya atu tonuvemuvemu keta togo'yona yagwanisi aviyaonana si munimuniye-dadaniya, yota kana tomuniyeina nukusi si kakawa.* ¹⁶ Eatunisi visime kana tovisawavenena atu yota Fanasi kunumina nenei si kitija tonuvemuvemu be togo'yona nukusi si kakawa eketa Yeisu kana tomuniyeina si iyavisiya si bwaduwa, “Ava fasinei i kaka tonuvemuvemu keta togo'yona nukusi?”

¹⁷ Tovanama Yeisu i nowaniya, i iyavisiya i bwaduwa, “Aviyaonana muka vivisafwavinai o muka ita nufotaisi sina nai togivibwina

* **2:15** Mosese Guyau yana visime i viginiwisiya keta Fanasi noko visimesima si muniye-dewadewisiya. Diu fiyaosi kasi sanu yagwanina yota maise si muniye-dewadewisiya. Si bwaduwa, namoġa aviyanana muka visimesima keta sanusima sita munimuniyeisi nao tasike togo'yona.

nenei. Vivisafwavinaisiā kasi nufota sina niya togivibwina nenei. Iyau a nemiya o muka aviyaonana si vivinuwadadana tasike toeyaeyana fasisiyai eatu aviyaonana si sanamaniya tasike togo'yna fasisiyai.”

*Nutoninuveine Vikokowana Fasinei
Madiu 9:14-17, Nuke 5:33-39*

18 Tova tamokaġa Yoni Togivibutabuta kana tomuniyeina keta tunisi Fanasi si vivikowana atu namoġa tunisi si nemiya Yeisu nenei eketa si bwaduwa, “Yoni kana tomuniyeina keta Fanasi si vivikowana eatu ava fasinei yo ka tomuniyeina muka sita vivikowana?”

19 Eketa nenesiyai i nufata i bwaduwa, “Tovanama vikawana kana ka-sebobo kana tovai, muka ita nufotai be tovivikawana kana wagawaga sina vikokowana taki tovivikawana tauna noko nukusi. Muka kana nufota uġuna tauna o nukusi si sesebobowa. **20** Eatu tamoka tova kana kaniyabina sina nemiya keta unaunana nenesiyai sina oviya keta sina niiya. Noko tovanama nenei yo sina vikokowana uġuna nuwatasi ina dauna.”

21 Yota i bwaduwa, “Iba kiouna a nemiiya atu muka kami sanu manatuwaina nukusi ita ovivikawaniya. Muka tamo aitevana nuya bidimina kiouna ina vai be nuya manatuwaina kana kabwasasa nenei ina suyakufukafuya. Taki ina fufuniya, kigona muninei nuya bidimina kiouna ina gogomiya nenei, nuya manatuwaina kana kaganini ina nakatadewadewa.

22 Muka tamo aitevana kana fata be waini kiouna kikitanina kana nogona fasinei waini kana koni manatuwaina nenei ina vininiwiya.

Taki ina fufuniya, noko waininama tovanama buğobugo ina kawanakanaka eketa kawasiveina ina vaneya nenei, koninama manatuwaina ina nuyavayavaniya uğuna muka kana fata koninama ina fata. Mwavinana nenei koni keta waini sina goyowa. Atu koni kiouna nenei, waini kiouna ina vininiwatotoiya.”

*Yeisu I Nusifufuwa Kuyadayada Sabati Fasinei
Madiu 12:1-8, Nuke 6:1-5*

²³ Sabati tamokağga nenei Yeisu kana tomuniyeina nukusi witi bwibwiyaguna sinenei si niniya eatu tomuniyeina witi sisina si gigimumuta sina kawa fasinei. ²⁴ Tunisi Fanasi tomuniyeina si kitisiya eketa Yeisu si iyaviya si bwaduwa, “Ku kitai! Ava fasinei yo Sabati kana visime si yakweyakweniya?”

²⁵ Eketa i bwaduviyewa nenesiyai i bwaduwa, “O tamo tova Guyau fonakituna sinenei viviginiweinana kwa gınağanaiya aviyavana Deivida i fufuniya tovanama yana namonamoğga nukusi vitanona si kikanata! Ava fasinei yo muka kana givina kwata vinuwadadanei?

²⁶ Tovanama Abiata tanake tovibwanaose kasi toviketanuneina yana tovai, Deivida i kanasuna Guyau yana Vada Tafutafuna sinenei keta i vikokoniya maneka fasinei. Eketa i veniya eatu noko manekanama o gigivitafuna eketa tovibwanaoseğga kasi nufota sina kaniya. Eatu Deivida tunina i kaniya yota aviyaonana si kwafuya tunina maneka i venisiya.”

²⁷ Yota i iyavisiya i bwaduwa, “Guyau Sabati i fufuniya be namoğga ina ovivitiya fasinei eatu

muka namōga ita fufuniya be Sabati kana dauna ina uniya fasinei. ²⁸ Na fasinei Namōga Natuna o Sabatinama kana Tuveka!”

3

*Yeisu Namōga Nimana Matematena
I Gidewadewiya*

Madiu 12:9-14, Nuke 6:6-11

¹ Tova tamokāga nenei Yeisu yota i makaviniya eketa i kanasuna numa kafa yokoyoko sinenei keta nokomai namōga nimana matematena i kitiya i nunuvitōga. ² Namōga tunisi nuwanuwasi be Yeisu sina vinoiya fasinei, matasi si vikanaōgosiya si tonetoneiya taki namōga noko ina gidewadewiya kuyadayada Sabati nenei o muka.

³ Yeisu namōga nimana matematena i iyaviya i bwaduwa, “Ku nemai be namōga nausiyai ku misini.” ⁴ Eketa namōgasima i nutoninuvenuviasi i bwaduwa, “Avamasi yata visime i sawateweyeita tata fufuniya kuyadayada Sabati nenei? Kita dewadewana tana fufuniya o goyona tana fufuniya? O kita yawasi tana gifafafaniya o taki tana nuvimiatiya?” Eatū matatafusi si numananava.

⁵ Na yana kayokūga i kitadadana nenesiyai. Atu katekatesi yana gua fasinei i nuwatadauna venemokena keta namōga nimana matematena i iyaviya i bwaduwa, “Nimau ku tunei.” Namōga nimana i tuniya eketa i dewadewa. ⁶ Tovanama nenei Fanasi si venukikinomana keta si niya tufomu Enoda kana tomuniyeina nenesiyai eketa tamo nenei Yeisu waina si fufuniya kana nuvimate fasinei.

⁷ Eketa Yeisu kana tomuniyeina nukusi si niya tobu nenei eatū Ganiniyei sabuvekamoka

si muniiya. ⁸ Yeisu kiyakiyaya kafa nuwatabau i savivinisiya bigana si nowaniya eketa biga si yauniya i niya Yudiya, Yenusanema, Idumiya yota menanasima Yonidani ukowa fafaninei be i fanakwaniuġa Taya eketa Saidoni nenesiyai namoġa si nemiya.

⁹⁻¹⁰ Noko kuyadayadanama nenei namoġa yagwanisi i givibwinisiya. Na fasinei tovisafwavināġa matatafusi kunausi si ketoketowiwiya be nuwanuwasi Yeisu sina gisikoniya. Eatu sabu nakasina fasinei kana tomuniyeina i iyavisiya be waka sina gidewadewiya fasinei be namoġa muka sina nibwatabwatavinai. ¹¹ Kanunu goyosi aviyaonana namoġa si nuwafisiya tovanama Yeisu si kitakitiya, si fekufekuwa tafakainei eketa si bwaubwauwa, “Kwaġa o Guyau Natuna!” ¹² Atu kanunu goyosi i viketofotisiya be muka wakakana sina sai tanake aitevana.

Yeisu Yana Tonowana 12 I Gibokisiya

Madiu 10:1-4, Nuke 6:12-16

¹³ Yeisu i vaneya koya nenei keta namoġasima yana nuwanuwa i wenisiya si nemiya nenei. ¹⁴ Namoġa nasi 12 i gibokisiya keta i wenisiya tonowana. Tasike o tanake nukusi eketa ina visimeisiya sina kikinomana be sina numamana, ¹⁵ eketa yota visime i venisiya be namoġa nenesiyai kanunu goyosi sina nukakisiya. ¹⁶ Nasi 12 i gibokisiya kasi wava o nofemaise.

Saimoni (i weniya Fita*),

3:9-10 Maka 4:1, Nuke 5:1-3 * **3:16** Giniki fonasiyai, Fita kana givina maise gabana.

- ¹⁷ Sebedi natunatuna, Yemesa eketa taina Yoni (i wenisiya *Bowanegesi* kana givina o kanitana natunatuna),
¹⁸ Anideneya,
 Finifi,
 Batonomiu,
 Madiu,
 Tomasi,
 Yemesa Anafasi natuna,
 Tadiusi,
 Saimoni Senoti[†] yokonama nenei,
¹⁹ eketa Yudasa Isikaniyoti, tanake o Yeisu kana toviwaifufuna.

*Namōga Si Bwaduwa Kanunu Goyona Yeisu
I Vivisimeiya*

Madiu 12:22-32, Nuke 11:14-23, 12:10

²⁰ Yeisu kana tomuniyeina nukusi si kanasuna numa sinenei, atu yota sabu si yoko-savavinisiya eketa muka kasi fata be sina ka. ²¹ Tovanama ugunina kana sifufu noko si nowaniya keta si bwaduwa, “Namōga noko debabouna i goyowa.” Eketa si niya be sina oviya.

²² Tunisi visime kana tovisawavenena Yenusanemei si sobunemiya keta si bwaduwa, “Seitani tauna kanunu goyosi kasi toviketanuneina, Yeisu i vivisimeiya. Tanake yana fiwana nenei eketa kanunu goyosi i vivikikinomanisiya.”

²³ Yeisu i wenisiya keta nenesiyai i bwadusobusobuwa i bwaduwa, “Namaise yo Seitani atu yota Seitani tauna ina kwaviniyi?

[†] **3:18** Senoti kana givina maise, Diu fiyaosi eatu yoko kabegona. Tasike nuwanuwasi Noma kana tovisime nukusi sina vikamunumunuwa. **3:22** Madiu 9:34, 10:25

²⁴ Taki kafa visime tauna ina sinatakatakiya be sina vikamunumunuwa, na kafa visimenama muka ina fakwa nubwayouna. ²⁵ Taki yota namoḡa ugunina ina sinatakatakiya be sina vikamunumunuwa, noko uguninama ina kayakweniya. ²⁶ Eketa taki Seitani yana yoko ina sinatakatakiya be sina vikamunumunuwa nao muka kana fata ina misini, yawane ina kakaviya. ²⁷ Muka tamo aitevana kana fata be namoḡa fifiwanina yana numa ina kanasunei be yana nogonogo ina gikuma. Kana nivaniva tamo namoḡa fifiwanamokena ina yoniya, yo muniyai yana numai ina gikuma.

²⁸ A iyaiyavimiya venemokena. Namoḡa yasi go'yna matatafunu be yasi bwadu-tafakaikokona Guyau nenei o ina vinuwateweisya. ²⁹ Atu taki kwaḡa aitevana Kanunu Tafutafuna kuna bwadu-tafakaikokoniya Guyau mukamokena ina vinuwateweyeu atu ya go'yna ina fakwavaḡata.” ³⁰ Yeisu i bwaduwanofemaise uḡuna visime kana tovisawavenena si bwaduwa, “Kanunu goyona i nuwafiya.”

Yeisu Ugunina Venemokena

Madiu 12:46-50, Nuke 8:19-21

³¹ Tovanama nenei Yeisu ayona eketa sisitaina si nemiya menanai si misimisiyi, atu kana matakawa si teweiya i niya be ina nemiya ina kitisiya. ³² Sabu Yeisu si toḡafifiniya eketa tasike fiyaosima o si iyaviya si bwaduwa, “Ayou keta sisitaiu menanai, nuwanuwasi kwaḡa.”

³³ Nenesiyai i nufata i bwaduwa, “Avi ayoku o avi sisitaiku?” ³⁴ Eketa namoḡasima si toḡafifiniya i kitinanainaisiya eketa i bwaduwa, “Kwa kitai! Nofe o ayoku eketa unaunaku. ³⁵ Aitevana Guyau yana nuwanuwa ina fufuniya, tanake unaku, nouku eketa ayoku.”

4

*Fwayafwaya Nufunina Kasi Bwadusobusobu
Madiu 13:1-9, Nuke 8:4-8*

¹ Yeisu yana visawavenena i kakina-savaviniya Ganini tobu kafakainei eketa sabuvekamoka si niya yana sifufu sina vaneneiya. Eatu si yokokwafuya na uḡuna wakai i toḡa atu namoḡa o tobu kafakainei si fakwa. ² Eketa iba yagwanina fasisiyai bwadusobusobuwai i visawavenena. I iyavisiya i bwaduwa,

³ “Kwa nowaniya! Namoḡa tamokaḡa kana bwibwiyaguwai fwayafwaya matatafunu i fonoyauyauniya eketa nugi etanei i giyauyauniya. ⁴ Tunisi ketai si fekuwa eketa manuwa si nemiya si kawa. ⁵ Atu tunisi gabagabaninei si fekuwa atu muka fwayafwaya badobadona na uḡuna si venuketovitakana, ⁶ atu kikwanakwanamisi muka sita sobu venemokena keta vanavana i vaneya nenei o i taoyayanisiya. ⁷ Nugi tunisi si fekuwa bubu kikikwanekwanena nenesiyai si tafwa atu bibusima si tunatautaunisiya keta muka sita vikabwaga. ⁸ Eatu tunisi nugi si fekuwa fwayafwaya dewadewanei keta si tafwadewadewa. Tunisi si sakuna 30 na kana vifofo, 60 na kana vifofo, eketa 100 na kana vifofo.”

9 Eketa i iyavisiya i bwaduwa, “Taki na taniyami maise avana a iyavimiya kwana nowaniya.”

Yeisu Yana Bwadusobusobu Na Kana Uḡu

Madiu 13:10-17, Nuke 8:9-10

10 Tovanama Yeisu kana kisina, yana tonowana kasi 12 yota namoḡa tunisi si nemiya Yeisu nenei keta si nutoninuvenuviya yana bwadusobusobusima fasinei.

11 I nufata i bwaduwa, “Kwami fiyaomima a gibokimiya be Guyau yana kafa visime kana nuwasisikona ana nusifufuwimiya. Atu mani namoḡa nenesiyai o muka ana givimayetadewadewai, naki bwadusobusobuḡa nenei ana nusifufuwisiya. **12** Nokomaise ana fufuniya ebe avana manatuwaina Guyau yana tomatakawa tamokaḡa i viginiwiya fasisiyai ina vivenemokena.

Naki sina kitakitiya,

atū muka sina kitakinanei.

Naki sina nowanowaniya,

atū muka sina nuwatasanamanei.

*Taki yasi fufunagoyo sina kitakinaniya keta
sina nuwatasanamaniya ebe sita ugevinisiya
nenekuwai
nao ata vinuwateweisija.”*

*Fwayafwaya Nufunina Kasi Tunina Kana Sana-
mana Fasinei*

Madiu 13:18-23, Nuke 8:11-15

13 Yeisu i iyavisiya i bwaduwa, “Nofe bwadusobu-
sobunama tamo kana sanamana nenemiyai?
Avi bwadusobusobu yoke kwana sanamanei?

14 Nugi kana toyauyauneina nao Guyau fonana kana toyauyauneina namōga yagwanisi nenesiyai. **15** Namōga tunisi yasi fakina maise ke'ta bwadusima si nowanowanisiya atu muka mwanenena Seitani i nenemiya keta i viviteweisiya. **16** Namōga tunisi o maise fwayafwaya gabagabanina, bwadu si nowanowaniya eketa muka mwanenena si katukatuviya na yasi sebobo, **17** atu muka na kikwanakwanamisi, na nenei keta yasi fakwa muka nubwayouna. Tovanama biga dewadewana fasinei dauna keta kuavava i kikikinomanisiya, si venuvenudibutoyōga. **18** Namōga tunisi o maise bubu sakasakanununa. Nofe namoisima o biga si nowanowaniya, **19** atu yasi nuwanuwa o kimoki fwayafwaya kana fakwafakwa ibasima nenesiyai, gabana keta iba tunisi kasi nisāga si nuwagabubuwisiya. Eketa noko ibasima biga dewadewana si tunatunatautauniya eketa muka ita viviuwa. **20** Fwayafwaya dewadewana o maise namōga tasike biga dewadewana si nowaniya keta si katuviya. Eketa tunisi si sakuna 30 na kana vifofo, 60 na kana vifofo, eketa 100 na kana vifofo.”

*Kimayeta Yana Kafa Misini Etanei
Nuke 8:16-18*

21 Yeisu yota i iyavisiya i bwaduwa, “Muka tamo aitevana kana fata kimayeta ina kanasunei keta kabomai ina kabwaniya o kivi sifunei ina tenei. Atu naki kana nufota be yana kafa misiniyai ina teniya. **22** Aviyavana makamakaviuneinasi o naki maise be ana tene-kikinomanisiya, eatu

avyavana kikikabwanisi o naki maise be ana vitanadadisiya. ²³ Taki na taniyami maise avana a iyavimiya kwana nowaniya.”

²⁴ Keta yota i kanakakina, “I kanoveimi be kwa vaneneğä-dewadewa, yami nowanautuutunama nenei yami sanamana ina givinakasiya yota ina vifofwiya. ²⁵ Tasike aviyaonana simo nenesiyai ina venevifofwisiya. Eatu tasike aviyaonana muka nenesiyai atu kabegona, naki nenesiyai ina viteweiya.”

*Guyau Yana Kafa Visime
Yana Tafwatafwa Kana Bwadusobusobu*

Madiu 13:31-32,34, Nuke 13:18-19

²⁶ Yeisu yota i bwaduwa, “Guyau yana kafa visime o nofemaise. Namogä tamokağä yana bagunai nugi i giyauyauniya. ²⁷ Nuwabuna i banubanuwa keta kuyadayada i misimisiniya, atu nugi o si tafwatafwa eatu muka ita sanamanei namaise. ²⁸ Fwayafwaya o nugi i gigivitafwiya, nauna ina ketovitakana, ina tafwa ina vaneya, eyo ina vikabwaga. ²⁹ Tovanama kabwagamokena ina gumaiya keta kiyana kana tova, namoğanama ina vibutuwa ina totuya.”

³⁰ Eketa Yeisu yota i iyavisiya i bwaduwa, “Avi bwadusobusobu tamo ebe nenei Guyau yana kafa visime ata sawanuvenuveyei? ³¹ Naki maise kayawana nugina musumusumokena namoğä si bagubaguniya, ³² atu tovanama ina tunakutuva o kaiuwauwa matatafusi i tufutufuteweisiya,

4:24 Madiu 7:2, Nuke 6:38 **4:25** Madiu 13:12, 25:29, Nuke 19:26

4:29 Yoweni 3:13

nağanina o si nakanakata keta bayawinei kana nufota be manuwa kasi gigi sina kiyona.”

³³ Nofemaise bwadusobusobusima yagwanina nenesiyai i nusifufuwisiya kana nivaniva si nowana kasi fata na yasi sanamana. ³⁴ Yana kikitana namoğa nenesiyai matatafuno o bwadusobusobu nenei, eatu kana tomuniyeinağā nenesiyai o matatafuno i gigivimayesiya.

Yeisu Fonimanabutu I Sawataniya

Madiu 8:23-27, Nuke 8:22-25

³⁵ Noko kuyadayadanama kana navinavi, Yeisu kana tomuniyeina i iyavisiya i bwaduwa, “Tana tamana fafaninei.” ³⁶ Tanake o wakai atu kana tomuniyeinağā si toğā eketa tanake nukusi yoko si teweisiya atu waka tunisi nukusi si tamana. ³⁷ Muka mwanenena atu fonimana i towa eketa nefo waka i siwatotoiya, eketa ukowa i vibutuwa i maamağā wakai.

³⁸ Yeisu waka kunenei i videbaboununakata keta i banubanuwa. Atu kana tomuniyeina si nuvauniya keta si bwaduwa, “Aiye, muka kuta vinuwana tana mateya fasinei!”

³⁹ I misiniya keta fonimana i dageiya i bwaduwa, “I katanai!” Yota nefo i iyaviya, “Ku nigwana!” Muka mwanenena fonimana i kataniya eketa manokutukutu i teweiya. ⁴⁰ Eketa kana tomuniyeina i iyavisiya i bwaduwa, “Ava fasinei yo kwa matutamoka? Yawane muka yami vitumağana?”

⁴¹ Naki kawasi si yaowa eketa tututausi si vikatonitoniya, “Nofe avi namoğa yo fonimana keta nefo fonana si nowaniya!”

5

Yeisu Kanunu Goyosi I Nukakisiya Namoḡa Tamokaḡa Nenei

Madiu 8:28-34, Nuke 8:26-39

¹ Yeisu keta kana tomuniyeina si nemiya Ganini tobu fafaninei fiyao Genasa yasi fafaniyai.

² Tovanama Yeisu i sobuwa wakai, namoḡa tamokaḡa kanunu goyona i nuwafiya matematesi kasi vatumuna nenesiyai i kikinomana-nemiya nenei. ³⁻⁵ I fakwafakwa vatumai. Muka tamo aitevana fifiwanamokena be ina vanetanai. Tova matatafunu kaena keta nimana seni nenesiyai si yonayoniya atu unavasima i kikionota eketa muka tamo aitevana kana fata be ina yona-savavinei. Kuyadayada keta nuwabuna tamokatamokaḡa vatumuna keta koya nenesiyai i ninikaokaoḡowa keta i bwaubwauwa yota tauna gabanai i nunugisagisasiya.

⁶ Tovanama Yeisu kedawanauwai i kituya i dibwana i niya eketa naunei kaetutuna i viketogunisiya, ⁷ eketa kayona nakasinei i tatakwayana i bwaduwa, “Yeisu, Guyau Etanemokenei Natuna! Ava ya nuwanuwa nenekuwai? Guyau kana wavai a vivikokonasineganiganiya muka kuna givikuvakuvavaneiku.” ⁸ Nofemaise i bwaduwiya uḡuna o Yeisu kanunu goyona nauna i miki-iyaviya, “Kanunu goyou namoḡa nofe ku gionovei!”

⁹ Yeisu i nutoniyya i bwaduwa, “Namaise ka wava?”

I nufata i bwaduwa, “Kaku wava Sagisagigi uḡuna kima yagwaniki namoḡa nofe sinenei.” ¹⁰ Eketa kanunu goyosi Yeisu si kamanemaneyeweyewi be muka sina nai tamo fafani nenei.

11 Niniusiyai o fonoyauwa si kakabubuna koya kafakainei, **12** eketa kanunu goyosi Yeisu si kamanemaniya si bwaduwa, “Ku sawateweiki be ku teweyeiki ka nai fono sinesiyai.”

13 Eketa sawateweine i venisiya keta namoḡa sinenei si kikinomana atu si niya fono nenesiyai si kanasuna. Fonoyawasima kasi yagwana 2,000 maise, tefai si sinowa eketa tobuwai si gavivina.

14 Fonosima kasi tokitavikavina si dibwana si niya menana nakasinei eketa yota menana tamokatamokaḡa nenesiyai matakawa si venutamatamaniya. Namoḡa si niya eketa aviyavana i kikinomana si kitiya. **15** Tovanama si nemiya Yeisu nenei, namoḡanama manatuwaina kanunu goyosi si nuwafiya si kitija na kana nuya keta yana nuwanuwa dawaniniina nenei i nuvitoḡa eketa matatafusi si matuta. **16** Aviyaonana si kitija avana i kikinomana namoḡanama keta fono nenesiyai namoḡa si iyavisiya. **17** Eketa Yeisu si kamanemaniya be vitana yasifafani ina teweiya.

18 Tovanama Yeisu wakai i toḡatoḡa, namoḡa nauna kanunu goyosi si nuwafiya i kamanemaniya be nukusi sita niya.

19 Atu Yeisu i sawataniya eketa nenei i bwaduwa, “Ku makavinau ya menanai be ya sabu kuna iyavisiya avana iba nakasina Tuveka i saviviniya fasiweu, eketa namaise yota yana sineganigani nenewe.” **20** Namoḡanama i makaviniya eketa Dekafonisi* nenesiyai

* **5:20** Giniki fonasiyi, Dekafonisi kana givina menana 10 nakanakasisi.

i nusifufuwa avana Yeisu i saviviniya nenei. Namoḡa matatafusi si nowaniya keta si mayaḡa.

*Yainusi Natuna Gumayogu Matematena
Keta Gumayogu Visafwavinaina
Madiu 9:18-26, Nuke 8:40-56*

21 Yeisu i tamana-savaviniya tobu fafaninei. Yawane tobu kafakainei atu sabuveka si nemiya keta si yokokwafuya. **22** Eatu namoḡa tamokaḡa kana wava Yainusi, tanake tamo numa kafa yokoyoko kana toviketanuneina, i nemiya Yeisu nenei. Tovanama Yainusi Yeisu i kitia i fekuwa kaeyafayafanei, **23** eketa nenei i vikokona-sineganiganiya i bwaduwa, “Natuku gumayogu kabegona, kabegomokena ina mateya. Kuta nemiya nimau tofwanei kuta teniya be kuta givibwiniya keta ita fakwa na yawasina.” **24** Tovanama si noḡokawawa, namoḡa sabuveka si yokokwafukwafuya keta nukusi si niya.

25 Gumayogu kana katona ufaufa i toatoḡateweteiya manamana 12 o nukusi sinesiyai. **26** Yana nogonogo matatafuna tokwenikweni nenesiyai i teweiya ebe vitana ita bwina eatu katonanama i nakatamoka. **27-28** Yeisu fasinei i biganowana keta nuwasinenei i bwaduwa, “Taki kana nuyaḡa ana gisikoniya nao ana dewadewa.” Eketa namoḡa sabuveka kasi sinefouwai i niya Yeisu kumunina keta kana nuya i gisikoniya. **29** Muka mwanenena ufaufana dibwadibwana i kaonosiya eketa tauna i kamukoniya vitana kana katona naki i kakaviya.

30 Noko tovanama nenei Yeisu i sanamaniya yana fiwana naki i kikinomana eketa namoḡa kasi sine-

fouwai i sağabwataviniya keta i bwaduwa, “Aitevana kaku nuya i gisikoniya?”

³¹ Kana tomuniyeina si iyaviya si bwaduwa, “Ku kitai! Namoğa sabuveka si yokokwafuwa atu namaise yo ku bwadubwadu, ‘Aitevana i gisikoniku?’”

³² Atu Yeisu i kitakitadadana be nuwanuwana ina kitiya aitevana i gisikoniya. ³³ Atu gumayogu i nuwatasanamaniya aviyavana i kikinomana nenei eketa na yana matuta yota na yana kinikuna i niya Yeisu naunei kaeyafayafanei i fekuwa, keta i iyaviya iba matatafunu kana venemokena nenei. ³⁴ Keta Yeisu i iyaviya i bwaduwa, “Natuku, ya vitumağanai ku dewadewa. Ka katona naki i kakaviya. Keiya nenei ku nai.”

³⁵ Yawane i nunusifufuwa atu namoğa tunisi Yainusi yana numei si nemiya keta si iyaviya si bwaduwa, “Natuu gumayogu naki i mateya. Ava fasinei tovisawavenena kuna visinatamatamane-kaōgowej?”

³⁶ Yeisu yasi bwadunama i nowanateweiya eatu i iyaviya i bwaduwa, “Muka kuna matuta, naki ku vitumağanamoka.”

³⁷ Muka tamo aitevana ita sawateweysi ebe yo nukusi sina nai naki Fita, Yemesa eketa kana tu-funuwa Yoni nukusi sina niya. ³⁸ Tovanama Yainusi yana numai si kikinomana Yeisu namoğa yag-wanisi i kitisiya si bwedibwedi-bwaubwauwa, ³⁹ eketa i kanasuna sinenei keta i iyavisiya i bwaduwa, “Ava uğuna yo kwa bwedibwedi-nukwae. Gwadimona-mona nai muka ita mate atu i banubanuwa.”

⁴⁰ Namoğa si kawanaviya fasinei matatafusi i vikikinomanisiya eatu gwadimonamona

ayona keta amana yota kana tomuniyeina kasi tonu nukusi si kanasuna totomuwai namai gwadimonamona i matamataveya nenei. ⁴¹ Nimanei i ova keta i bwaduwa, “*Tanita kumi*,” kana givina, “Gumayogu kabegou a iyaiyaviwa ku misini.”

⁴² I venuotowamisiniya keta i fanakwanikwaniūga. (Tanake kana manamana 12.) Eketa si mayaġamatatafuwa. ⁴³ Eketa Yeisu visime fifiwanamokena i venisiya ebe muka tamo aitevana sina iyavei. Eyo i bwaduwa, “Ava tamo kwa venei be i kawa.”

6

Fiyao Nasaneti Yeisu Si Dibutoyoiya

Madiu 13:53-58, Nuke 4:16-30

¹ Yeisu kana tomuniyeina nukusi menana noko si teweiya keta si makavinisiya Nasaneti tauna yana menana nenei. ² Sabati kana kuyadayada nenei i vibutuwa visawavenena numa kafa yokoyoko sinenei. Namōga yagwanisi si nowaniya keta si mayaġa. Tututausi nenesiyai si vikatonitonija si bwaduwa, “Namasimo nofe nuwanuwimasima i vaisi, avi nuwatasuyasuya nenei eyo kafa nuwatabau fifiwanisi i gigikikinomaneisi? ³ Namōga nofe o naki tokabitamomoka. Ayona o Meni eketa sisitaina o Yemesa, Yosefa, Yudasa keta Saimoni, yota nounouna nukusi nofemai ta fakwafakwa.” Eketa si dibutoyoemokiya.

⁴ Yeisu i iyavisiya i bwaduwa, “Namōga Guyau yana tomatakawa si vivifotuwisiya, eatu tututausi yasi menana namoisi be yasi sabu eketa yasi

fasekwa o muka sita vivifotuweisī.” ⁵⁻⁶ Eketa Yeisu i mayaṅga uğuna namoṅga muka sita vitumaṅana, na fasinei muka kana fata be tamo iba fifiwanina nokomai ita fufuniya eatu nimana i dawana nasi viyamoka tofwasiyai eketa si bwina.

*Yieu Yana Tonowana I Visimeisiya Si Niya
Menana Nenesiyai*

Madiu 10:5-15, Nuke 9:1-6

Eketa i fanakwaniūga menana nenesiyai i vivisawavenena. ⁷ Yeisu yana tonowana i wenevakukusisiya eketa nuwesinuwesi i visimeisiya menana nenesiyai. Eketa visime i venisiya ebe kanunu goyosi sina vatanisiya, ⁸ eketa i iyavisiya i bwaduwa, “Yami nainama nenei muka tamo aviyavana kwana uniya, muka kabwaga, kautu o gabana, naki kiwanaṅga tamokaṅga. ⁹ Kami kaevatakutakuna kwana kikotonina eatu muka tamo nuya kana vinuwa kwana uniya. ¹⁰ Taki avi menana nenei kwana niya, tamoka numanama nenei kwana fakwa kana nivaniva na menaninama kwana teweiya. ¹¹ Taki kwana nemiya tamo menana nenei atu namoṅga muka sina katuvaimi o sina nowanimi, kaeyafayafami kasi kafusisima kwana nubutusiya eatu kwana niya. Noko ina visawavenena vitana matasi ina kanakasiya.”

¹² Eketa si niya namoṅga si iyaiyavisiya, “Yami fufunagoyo nenesiyai kwana ugevinimiya ebe kwana makavinimiya Guyau nenei.” ¹³ Kanunu goyosi yagwanisi si vikikinomanisiya eketa onive

bubunei namoḡa tovisafwavināḡa tofwasiyai si kisiwaḡa eketa si givibwinisiya.

*Tufomu Enoda Anitifasi Keta Yoni
Togivibutabuta Yana Mate
Madiu 14:1-12, Nuke 9:7-9*

14-16 Yeisu bigana i kewa eketa namoḡa matatafusi kana wava si sanamaniya. Tunisi namoḡa si bwadubwaduwa, “Kana fata be iba fifiwanisi ina saviviniya uḡuna tanake Yoni togivibutabuta matematesi nenesiyai i misini-savaviniya.” Tunisi namoḡa si bwaduwa, “Tanake o Inaitiya i makaviniya.” Tunisi namoḡa yota si bwaduwa, “Tanake maise tomatakawa manatuwaina.”

Nofe ibasima fasisiyai, tufomu Enoda Anitifasi i biganowana eketa i bwaduwa, “Yoni togivibutabuta kayona a nuonotateweiya eatu mateyai i misini-savaviniya.”

17-20 Kana sifufumokena nofemaise. Muniyai yo Yeisu i vibutuwa visawavenena, Enoda taina Finifi kawana Enodiyasi i vikawanisiya. Munifotai Yoni Enoda i iyaviya i bwaduwa, “Yata visime nenei muka tamo ka sawateweeyeina be taiu kawana ku vikawanisi.” Na fasinei Enoda yana tonuaviya i visimeisiya si niya. Yoni si givikaviniya, si yoniya eketa deniyai si teniya. Enoda keta Yoni yasi vikanunusifufu nenei Enoda nuwanuwa yaona venemokena i viya, eatu naki nuwanuwana be ina vanevaneneiya. Enodiyasi o si kayokayokuḡa nuwanuwasi be Yoni sina nuvimatiya atu Enoda i sanamaniya Yoni o namoḡa dewadewana keta

tafutafuna na uğuna i matuta eketa i ofafafiya. Na nenei Enodiyasi muka kasi fata Yoni sita nuvimatei.

²¹ Enodiyasi yasi kuyadayada dewadewana i kikinomana, Enoda yana kafa tufuwa kana tuku kana tovai. Enoda ka nakasina i fufuniya tovisime nakanakasisi be tonuaviya kasi toviketanuneina keta Ganini kasi toviketanuneina fasisiyai.

²² Enodiyasi natusi gumayogu i kanasunanemiya keta yana vağai Enoda kana yokoyoko nukusi i givisemwanisiya. Eketa tufomu gumayogu kakaabana i iyaviya i bwaduwa, “Aviyavana ya nuwanuwa kuna bwaduwiya, ana veniwa.”

²³ Eketa bwadudabadaba fifiwanina nenei i iyaviya i bwaduwa, “Aviyavana ya nuwanuwa kuna vikokonikuwa, maise yaku kafa visime tunina ana veniwa.”

²⁴ Gumayogu i kikinomana keta ayona i iyavisiya i bwaduwa, “Avamasi fasinei ata vikokona?”

Ayona si nufata si bwaduwa, “Yoni togivibutabuta debabouna fasinei kuna vikokona.”

²⁵ Dibwadibwanina nenei i venumakaviniya tufomu nenei eketa i bwaduwa, “Nuwanuwaku nofe tova Yoni togivibutabuta debabouna kuna nuonosiya keta kanusana nenei kuna totoiya keta kuna venikuwa.”

²⁶ Nofe bwadunama tufomu nuwatana i gividauniya venemokena, eatu naki kana yokoyoko matasiyai i bwadudabadaba na fasinei yana vikokona muka ita dibutoyoge. ²⁷ Eketa muka mwanenena tonuaviya i visimeiya be Yoni debabouna ina nemiiya. Namoğanama i niya deni nenei eketa Yoni kayona i nuonosiya, ²⁸ kanusana

nenei debabouna i nemiiya gumayogu i veniya eketa gumayogu i viya ayona i venisiya.

²⁹ Tovanama Yoni kana tomuniyeina bigana si nowaniya, si nemiiya eketa tofwana si viya keta vatumuna nenei si odewadewiya.

Yeisu Namōga 5,000 I Vikanisiya

Madiu 14:13-21, Nuke 9:10-17, Yoni 6:1-14

³⁰ Tonowana si makavinisiya eketa iba matatafunava si fufuniya yota si visawavenena, si bwaduwekikinomaniya Yeisu nenei. ³¹ Na tovanama nenei, namōga yagwanisi Yeisu si venuvenuyeweyewiya eketa muka tamo yasi kawasasa be sina biyawasa. Na fasinei Yeisu i iyavisiya i bwaduwa, “Kwamīga kwa nemai. Sabu nofe ta teweyeisi be ta nai kabāga nunukamumunina nenei ebe ta viyawasi.”

³² Eketa tasikēga wakai si niya kabāga nunukamumunina nenei. ³³ Atu yasi nōgokawawanama nenei, namōga menana kana matatafu nenesiyai si kitakinanisiya eketa si venufana noko kabāganama nenei muniyai yo Yeisu kana tomuniyeina nukusi si saniniya. ³⁴ Tovanama Yeisu wakai i sobuwa, sabuveka i kitisiya. I kitasineganiganisiya ūguna tasike maise sifi muka na kasi tokitavikavina, na ūguna i vibutuwa i visawavenena iba yagwanisi nenesiyai.

³⁵ Navinavimokeyai kana tomuniyeina si nemiiya nenei eketa si bwaduwa, “Nofe wanakikavai eatu vanavana naki i sonusonuwa. ³⁶ Na fasinei namōga ku teweyeisi be si nai menana

6:34 Gināganāga 27:17, 1 Tufomu 22:17, 2 Sifusifufu 18:16, Isikeni 34:5, Madiu 9:36

ketamwakufwai, tututausi kasi kabwaga simo si yikimwane ebe si kawa.”

³⁷ Eatu i nufata i bwaduwa, “Kwami tututaumi tamo aviyavana kwa veneisi be si kawa.”

Eketa si iyaviyi si bwaduwa, “Omasi 200 siniva* nenei maneka kana kimwanisiya keta kana vikanisiya?”

³⁸ Eketa i nutoninuvenuvisya i bwaduwa, “Aviyesi maneka nenemiyai? Kwa nai be kwa dadana.”

Tovanama si nisaiya, si bwaduwa, “Maneka 5 eketa iyana nuwesi weka.”

³⁹ Yeisu sabuveka i iyavisiya i bwaduwa, “Bubuwai kwana fakwasiotoga yoko nenesiyai.” ⁴⁰ Eketa yoko nenesiyai si fakwasiotoga. Tunisi kasi yagwana 50 atu tunisi o 100.

⁴¹ Tovanama Yeisu maneka 5 keta iyana nuwesi i visiya, i kitavaneya abamai ibasima fasisiyai Guyau i viagigikuviya. Maneka i gisinesiniya eketa kana tomuniyeina i venisiya keta si vitukuwa namoغا nenesiyai. Keta yota iyana nuwesi i gikotokotova keta i vitukuwa matatafusi nenesiyai.

⁴² Eketa matatafusi si kasiyuwa venemokena,

⁴³ munifotai Yeisu kana tomuniyeina maneka keta iyana tufotufo si kwakwiya keta feyawa 12 si vimaisiya. ⁴⁴ Namoغا kasi yagwana 5,000 na yasi susu kabwaginama si kaniya.

Yeisu Ukowa Etanei I Niya

Madiu 14:22-33, Yoni 6:15-21

⁴⁵ Muka mwanenena Yeisu kana tomuniyeina i iyavisiya be wakai sina venuviketanuna menana Betisaida nenei tobu fafaninei, eatu noko

* **6:37** 200 siniva o yamayamana 8 tobunanige fatana maise.

sabusima i teweisiya si niya. ⁴⁶ I vioiyoowisiya muninei i vaneya koyai kawanunuku fasinei.

⁴⁷ Navinavinama nenei Yeisu kana tomuniyeina yasi wakai tobu sinefounei si kikinomana, eatu tanake kana kisina si sinanoviya. ⁴⁸ Eketa i kitisiya kana tomuniyeina si oioiya na yasi fiwana uguna fonimana keta yoyo si viketosoğaniya. Eketa tovawedanai Yeisu ukowa etanei i niya kuweyaisi be vitana ina tutuunisiya. ⁴⁹ Atu tovanama si kitiya si bwaduwa vitana mayamayau ukowa etanei ita nenemai eketa si tatakwayaniya. ⁵⁰ Matatafusi si kitiya si matuta.

Eketa Yeisu i venubwadufotafota i iyavisiya, “Muka kwana matuta. Kwa katevatu. Iyau weka.” ⁵¹ Yeisu i toğā wakai eketa fonimana i onoviya. Kawasi i yaowa, ⁵² uguna avana i saviviniya maneka nenesiyai si kitiya eatu muka sita nuwatasanamaniei yana fiwana keta katekatesi si fakina.

*Yeisu Tovisafwavināğā Yagwanisi
I Givibwinisiya Menana Genasaneti Nenei
Madiu 14:34-36*

⁵³ Tobu si witamaniya keta Genasaneti si saniniya. Nokomai waka si nusifwiya. ⁵⁴ Tovanama wakai si sobuwa, namoğā Yeisu si venukitakinaniya. ⁵⁵ Namoğā si venusavaneneğāfafaninama nenei. Avi kabağā nenei sina nowaniya Yeisu nokomai, tovisafwavināğā na sitasi si nenemiisiya nenei. ⁵⁶ Yeisu i niya menana-sifunu yota menana nakanakasisi eketa numa-sifunu nenesiyai. Noko kabağasima nenesiyai namoğā tovisafwavināğā si nenemiisiya eketa kabağā kafa vivitamaneina nenesiyai si dawadawana, eatu Yeisu si vivikokoniya

be kana kwame matakafafanaña sita gisikoniya. Eketa aviyaonana si gisikoniya si dewadewa.

7

*Guyau Yana Visime, Waḡawaḡasi Kasi Sanu
I Vanetaniya*

Madiu 15:1-9

1-4 Fanasi keta Diu fiyaosi yagwanisi waḡawaḡasi nenesiyai kasi sanu i donanisiya eketa si munimuniya. Kasi owa be tukwava eketa taga si nunutamatama kana ketaketai venemokena ebe si vitumaḡaniya noko kukuwasima eyaeyasi Guyau matanei. Tovanama kafa vivitamaneina nenei sina makavinisiya, nauna nimasi sina kigona kana ketaketai muniyai yo sina kawa. Tova tamokaḡa Fanasi keta yota tunisi Mosese yana visime kana tovisawavenena Yenusanemei si nemiya nukusi Yeisu si yokokwafuya be sina vaneneiya fasinei. Si kitisiya tunisi tomuniyeina muka nimasi nauna sita kigona eatu kasi kabwaga si kakawa.

5 Eketa si iyaviya si bwaduwa, “Ka tomuniyeina nimasi gavigavisi atu si kakawa. Ava uḡuna yo waḡawaḡata kasi sanu muka sita munimuniyei?”

6 I nufata i bwaduwa, “Kwami meyami vinav-inasi avage vitana dewadewami! Tova man-attuwaina Guyau yana tomatakawa Aiseya ven-emokena i viginiwiya kwami fasimiyai. Nofemaise i viginiwiya,

*Guyau i bwaduwa, ‘Namoḡa nofe kawagebunasiyaīḡa
si vivifotuwikuwa
eatu katekatesi i fakwa sasanei.*

*7 Tututausi kasi sanu si vivisawavenena yo muniyai
si bwadubwaduwa vitana noko Guyau yana
visime,
eketa kaku kodukodu nenesiyai o
i viibakaokaoğowa.’”*

*8 Eketa Yeisu i bwaduwa, “Guyau yana visime
kwa dibudibutoyoiya atu kwami tututaumi kami
sanu kwa munimuniya. ⁹ Kwa vivinuwadadana
vitana dewadewana kwata fufufuniya atu Guyau
yana visime kwa visağaketuketuwiya eatu
wağawağami kasi sanu kwa viya o kwa munimuniye-
dewadewamokisiya. ¹⁰ Nofe yota tamo kafa kita
kwa fufufuniya. Mosese i viginiwiya i bwaduwa,
'Amau keta ayou kuna vifotuwisiya,' keta 'Taki
tamo aitevana ina vikanatafutafuwa amana o ayona
nenesiysi, na gwadinama kwana nuvimatiya.'
¹¹ Atu nofemaise kwa vivisawavenena. 'Taki
tamo aitevana ibanama nenei, kana nufota be
amana o ayona ina ovivitisiya eatu ita iyavisiya,
"Iba nofe kaku nufota be nenei ata ovivitimiya
eatu a tenesiniya be Guyau ana veniya, na fasinei
muka kaku nufota be ana veneimi." ¹² Taki
nokomaise ina fufuniya nao kwana bwaduwa, 'Naki
dewadewana.' Na nenei kwa viviketofotiya eketa
muka ayona be amana ina oviviteisi. ¹³ Tovanama
nofemaise kwana fufuniya, nao wağawağami
kasi sanuğā kwa munimuniya eatu Guyau yana
visime kwa vivibakaokaoğowiya keta yota ketaketa
yagwanisi nenesiyai nofemaise kwa fufunisiya.”*

Avi Fufuna Namoğā I Gigivigavigavisi Guyau

7:10 Yauna 20:12, 21:17, Visime Tafu 20:9, Visime Nuvinavinana
5:16

*Matanei**Madiu 15:10-20*

¹⁴ Yeisu namōga i wene-savavinisiya si nemiya nenei eketa i iyavisiya i bwaduwa, “Matatafumi yaku sifufu kwana nowanautuutuya be kana sanamana kwana viya. ¹⁵ Aviyavana tamo namōga kawanei ina kanasuna o muka ina givigavigaviya. Eatu avana kawanei ina kikinomana, enao ina givigavigaviya Guyau matanei.”*

¹⁷ Namōga i teweisiya eatu i kanasuna numai, keta kana tomuniyeina si nutoninuvenuveiya bwadusobusobu i nusifufuviya kana sanamana fasinei.

¹⁸⁻¹⁹ I nufata nenesiyai i bwaduwa, “O kwami yota yawane muka kwata sanamanei yaku sifufu kana givina! Muka kwana nuwatasanamanei tovanama namōga kabwaga ina kaniya, noko kabwaganama muka ina kanasuna nuwafounei, eatu ina niya kamokamonei eketa ina kikinomana. Muka kana fata be ina givigavigaviya.” Tovanama Yeisu noko i bwaduwiya, i visawavenena vitana kabwaga matatafuno o eyaeyana Guyau matanei.

²⁰ Yota i bwaduwa, “Avana namōga sinenei ina kikinomana noko ibanama ina givigavigaviya.

²¹ Nofe ibasima o namōga nuwafounei si kikinomana — vinuwadadana goyosi, vimomona-kaokaōgo, gikuma, nuvimate, kudo,

²² kanufafa, fufuna goyosi, bwadu-vikanonono, matayaiyaina, vikumaīgi, sawanuketu, nuwavane, akwavakwava. ²³ Nofe ibasima

* ^{7:15} Tunisi viginiwa manatuwaisi nenesiyai o kana nukisi 16 si nunatuya. “Taki na taniyami maise avana a iyavimiya kwana nowaniya.”

matatafuna goyosi nuwafounei si kikikinomana eketa namoḡa si gigivigavigaviya.”

*Ne Foenisiya Yasi Vitumaḡana Yeisu Nenei
Madiu 15:21-28*

²⁴ Eketa Yeisu menana noko i teweiya eatu i niya menana tamokaḡa nenei Taya keta Saidoni niniusiyai eketa i niya numa tamokaḡa nenei. Muka nuwanuwana be namoḡa sina sanamanei tanake o noko menananama nenei, eatu muka kana fata ina makaviuna. ²⁵⁻²⁶Gumayogu tamokaḡa si nowaniya vitana Yeisu o nokomai eketa muka mwanenena si nemiya nenei. Gumayogu nofe o muka ne Diu, tasike ne yauyauna. Si tufuwa menana Foenisiya neneifafani Siniya sinenei. Kanunu goyona natusi gumayogu i vivisimeiya fasinei keta si nemiya Yeisu nenei. Eketa si fekuwa kaeyafayafanei eketa si kamanemaniya be natusi nenei kanunu goyona ita vikikinomaniya.

²⁷ I sanamaniya tasike muka ne Diu eketa i iyavisiya i bwaduwa, “Fiyagenagena nauna sita mikikawa, muka kana nufota be fiyagenagena kasi kabwaga ana vai keta ana teweyei anuketa nenesiyai.”†

²⁸ Eatu si nufata si bwaduwa, “Tuveka yo, ava ku bwaduwiya o venemokena, eatu anuketa sonama sifunei fiyagenagena kasi kawamusumusu i fekufekuwa, si kanikaniya.”

²⁹ Eketa i iyavisiya i bwaduwa, “Yami bwadunama dewadewana na fasinei kwa nai yami ketai,

† ^{7:27} Fiyagenagena bwadusobusobu nofe sinenei o Diu fiyaosi. Si vivinuwadadana vitana tasike dewadewamokesi yo yauyauna namoisi. Na fasinei tamo tova namoḡasima si weniwenisiya anuketa.

eatu kanunu goyona o natumi gumayogu naki i gionoviya.”³⁰ Tovanama si kikinomana numai, natusi si kitiya i matamataveya kana kiviyai eketa si sanamaniya vitana kanunu goyona naki natusi i gionoviya.

*Yeisu Namōga Taniyana Kweuna Yota Meyana
Danuna
I Gidewadewiya*

³¹ Yeisufafani Taya i teweiya eketa i vaonota Saidoni sinefounei. Eketa i niya Ganini tobuwai Dekafonisi yana fafani sinesiyai.³² Nokomai namōga tamokāga taniyana kweuna yota meyana danuna si nemiiya. Eketa Yeisu si vikokona-sineganiganiya be nimana ita teniya tofwanei be ita dewadewa.

³³ Namōganama i oviya eketa kasi nuwa si niya si misinikafasina eketa namōganama taniyanei nimatafwana i katukanasunisiya, muniyai yo i nufuniya eketa meyana i gisikoniya.³⁴ Eyo i kitavaneya abamai, yawasina i tuniya eketa namōganama nenei i bwaduwa, “Efata!” Kana givina o “I kagegeu!”³⁵ Tovanama nenei namōga taniyana i kanabuya yota meyana i savivina keta i nusifufudewadewa.

³⁶ Yeisu i sawasawatanisiya be muka tamo aitevana sina iyavei aviyavana i kikinomana fasinei. Eatu namōga yagwanisi nenesiyai si nusifufuwe-dadaniya.³⁷ Tovanama namōga biga noko si nowaniya, si sabanutūga eketa si bwaduwa, “Iba matatafunu i savivinisiya o dewadewana. Namōga taniyasi kweusi i gigidewidewisya keta si nowanowana, yota meyasi danusi i gigidewidewisya keta si nunusifufuwa.”

8

Yeisu 4,000 Namōga I Vikanisiya

Madiu 15:32-38

¹ Noko tovanama nenei namōga yagwanisi yota si yokowa. Sabu kabwaga muka, na fasinei Yeisu kana tomuniyeina i wenevakukusisiya eketa i iyavisiya i bwaduwa, ² “Namōga a kitasineganiganiisiya ūguna kasi kabwaga muka, eatu kuyadayada tonusi naki ka fakwafakwa. ³ Taki na vitanonisi ana teweisiya be sina niya yasi numai ketai sina sasana. Yota tunisi kedawanauwai si nemiya.”

⁴ Kana tomuniyeina si nufata si bwaduwa, “Nofe o wanakikavai, keta namao kabwaga tana vai yo namōga tana vikanisi?”

⁵ Keta Yeisu i nutoninuveisiya i bwaduwa, “Aviyesi maneka nenemiyai?”

Si bwaduwa, “Naki 7moka.”

⁶ Yeisu namōga i iyavisiya keta fwayafwayai si fakwasiotoga. Maneka 7 i visiya, Guyau nenei i viagigikuwa eketa maneka i gisinesiniya. Kana tomuniyeina i venisiya eketa namōga nenesiyai si vitukuwa. ⁷ Yota iyana tonusi musumususi tomuniyeina nenesiyai i visiya, Guyau nenei i viagigikuwa eyo i iyavisiya keta namōga nenesiyai sina vitukuwa.

⁸ Namōga matatafusi si kasiyuwa venemokena eatu yota gisinesine yagwanina i tufowa. Munifotai tomuniyeina feyawa 7 si vimaishiya gisinesimesima nenesiyai. ⁹ Namōga kasi yagwana 4,000 maise Yeisu i vikanisiya, muniyai yo i visimeisiya si niya yasi menanai.

*Fanasi Guyau Nenei Kiyakiyaya Fasinei
Si Vikokoniya
Madiu 12:38-42, 15:39—16:4*

¹⁰ Muka mwanenena Yeisu kana tomuniyeina nukusi wakai si tōga eketa si niya Danumanuta kawakawana nenei. ¹¹ Fanasi tunisi si nemiya keta si vibutuwa Yeisu nukusi si vikawabwadubwaduwa be Yeisu sina anuvanuviya, na fasinei si vikokoniya be tamo kiyakiyaya abamei ita visawavenisiya.

¹² Yeisu yawasina i tununoviya keta i iyavisiya i bwaduwa, “Ava fasinei yo kwami nofe tovasima kasi namoga kiyakiyaya fasinei kwa vivikokona Guyau nenei? A iyaiyavimiya venemokena, muka tamo kiyakiyaya ana visawaveneimi.”

*Fanasi Keta Enoda Yasi Nutuva
Madiu 16:5-12*

¹³ Eketa Yeisu Fanasi i venumakanovisiya eatu i tōgasavaviniya wakai keta kana tomuniyeina nukusi si tamana Ganini tobu fafaninei. ¹⁴ Tomuniyeina nuwatasi iunuwa eketa muka tamo maneka sita niyei, eatu naki tamokāgamoka waka sinenei. ¹⁵ Yeisu i bwaduwa, “Matami i nakata ebe muka Fanasi eketa Enoda yasi nutuvai sina vikonaimi.”

¹⁶ Tomuniyeina tututausiga si vikanusifusifufuwa yana bwadunama fasinei keta si bwaduwa, “Muka tamo maneka tata nemiei na ūguna nutuva fasinei i bwadubwaduwa.”

¹⁷ Yasi vikanusifusifufunama Yeisu naki i sanamaniya eketa i iyavisiya i bwaduwa, “Ava fasinei kwa bwadubwadu vitana muka tamo maneka nenemiyai! O yawane muka kwata kitansagai

o kwata nuwatasanamanei! Kwami gewa katekatemi guasi. ¹⁸⁻¹⁹ Na matami atu muka kwata kitakitadewadewa eketa na taniyami atu muka kwata nowanowanadewadewa! Kwana tukuya tovanama maneka 5 a gisinesinisiya namōga 5,000 fasisiyai, aviyesi tufotufo feyawa?”

Si bwaduwa, “Feyawa 12 si tufowa.”

²⁰ “Eatu maneka 7 a gisinesinisiya namōga 4,000 fasisiyai, nao aviyesi feyawa tufotufo kwa vimāgaisi.”

Si bwaduwa, “Feyawa 7.”

²¹ Eketa i bwaduwa, “O atu yawane muka kwata nuwatasanamanei?”

Menana Betisaida Nenei Yeisu Tomatagoyo I Gidewadewiya

²² Tovanama si kikinomana menana Betisaida nenei, nokomai namōga tunisi tomatagoyo tamokāga si nemiiya eketa Yeisu si kamanemaniya ita givikaviniya be ita dewadewa. ²³ Eketa tomatagoyo nimanei i givikaviniya eketa i kikinomaniya menana kukwauna. Matana i nufunatanisiya eketa nimana i dawana tofwanei eatu i iyaviya i bwaduwa, “Tamo aviyavana ku kitakitiya?”

²⁴ Matana i kabwasasiya eketa i bwaduwa, “Ika, namōga a kitikitisiya eatu vitana kai sita ninidadana.”

²⁵ Yota Yeisu nimana i tene-savaviniya namōga matanei. Matana i katototuya eketa i ba matata-funa i kitadewidewisiya.

26 Eketa Yeisu i bwaduwa, “Muka kuna makavineu menanai, naki dawaniniina kuna niya ya numai.”

Fita Yana Bwadukikinomana Togifafafana Gigi-bokeinana Fasinei

Madiu 16:13-20, Nuke 9:18-21

27 Yeisu kana tomuniyeina nukusi si niya menana Sisaniya Finifai niniunei keta si niniya atu ke'ta tofwanei i nutoniisiya i bwaduwa, “Namaise namōga si bwadubwadu fasikuwai, Iyau aitevana?”

28 Eketa si nufata si bwaduwa, “Tunisi namōga si bwadubwaduwa avage kwāga o Yoni Togivibutabuta, eatu tunisi o si bwadu avage Inaitiya. Eatu tunisi o si bwadubwaduwa kwāga tamo Guyau yana tomatakawa.”

29 Eketa i nutoninuvenuveisiya i bwaduwa, “Eatu kwami o namaise kwata bwadu fasikuwai?”

Eketa Fita i nufata i bwaduwa, “Kwāga o Togifafafana Gigibokeinau.”

30 Eatu Yeisu tauna i viketofotisiya ebe muka wakakana sina sai tanake aitevana.

Yeisu Yana Mate I Bwaduviōgoniya

Madiu 16:21-23, Nuke 9:22

31 Eketa Yeisu i vibutuwa tomuniyeina i gisawakedanisiya aviyavana yawane ina kikinomana tauna nenei. I iyavisiya i bwaduwa, “Namōga Natuna yawane ina kuvavana iba yagwanina nenesiyai. Tokawakawa be tovibwanaose nakanakasisi keta yota visime kana tovisawavenena sina utuvifwayafwaiya. Nifanifaina sina nuvimatiya eatu kuyadayada tonusi muninei mateyai ina misini-savaviniya.”

32 Tovanama nofemaise i givimayetamokiya nenesiyai, Fita Yeisu i oviya i niiya kuniniusi eketa i dageiya.

33 Atu Yeisu i saḡaviniya kana tomuniyeina i toneisiya eketa Fita i dageiya i bwaduwa, “Seitani, ku nai sasanei! Ya vinuwadadana muka Guyau yana vinuwadadana maise, eatu maise namoḡa.”

Vitomuniyeina Kana Ketaketa

Madiu 16:24-28, Nuke 9:23-27

34 Yeisu sabu i wenevakukusisiya kana tomuniyeina nukusi eketa i nusifufuwisiya i bwaduwa, “Taki kwaḡa aitevana nuwanuwau be kuna muniikuwa, ya nuwanuwa kuna tenemuniukwanisiya eatu tauḡu ka ogonaḡanaḡa kuna uniya keta kuna muniikuwa.*

35 Taki kwaḡa aitevana nuwanuwau yawasiu kuna gifafafaniya, nao kuna niteweiya. Eatu taki fasikuwai keta yota biga dewadewana fasinei yawasiu kuna niteweiya, nao kuna gifafafaniya.

36 Taki aitevana tamo fwayafwaya kana matatafu kana kaikaiwabu ina viya eatu yawasi muka, nao ava tamo kana dewadewana? **37** Na fasinei taki namoḡa yawasina venemokena ina niteweiya, muka kana fata be tamo avana nenei ina fatai be yo ina visavavinei. **38** Nofe tovasima kasi namoḡa o tokudo keta tofufunakaokaoḡo maise eketa taki aitevana ina sinemumuwiwuwa maise yota yaku bwadu ina sinemumuwiwuwa nofe

* **8:34** Nofe bwadusobusobu kana givina Yeisu kana tomuniyeina sina katuviya tamo kafa sinemumu o kuvavana sina viya na fasinei si munimuniyya. Muka ita bwadubwadu vitana kana tomuniyeina sina mate ogonaḡanaḡai maise tanake. (Madiu 10:38, Nuke 14:27)

8:35 Madiu 10:39, Nuke 17:33, Yoni 12:25

namoisima yasi tovai, yawane Namoṅga Natuna yota ina sinemumuwiṣiya tovanama ina makaviniya fwayafwayai amana yana kaiwabu keta yota kana kaetoṅga tafutafusi abamei nukusi.”

9

¹ Yeisu i iyavisiya i bwaduwa, “A iyaiyavimiya venemokena, namoṅga tunimi nofemai kwa misimisiniya Guyau yana kafa visime ina nemiya na yana fiwana kwana mikikitiya muniyai yo kwana mateya.”

*Yeisu I Dawanavinavina
Madiu 17:1-13, Nuke 9:28-36*

² Kuyadayada 6 muninei Yeisu kasi tonuṅga, Fita, Yemesa yota Yoni i ovisiya eketa tasikeṅga si vaneya koya etanei. Nokomai tututausi matasiyai si kitija Yeisu i dawanavinavina. ³ Kana nuya si kwaya eketa si nukawanamanamanina. Muka tamo aitevana fwayafwayai kana fata ina gonaisi nokomaise. ⁴ Munifotai Inaitiya keta Mosesi si kenokikinomana keta Yeisu nukusi si nusifufuwa.

⁵ Fita i bwaduwa, “Tovisawavenena, naki dewadewamokena kima nukusi nofemai eketa vada tonusi kana yonisiya, tamokaṅga kwaṅga fasiweu, tamokaṅga Mosesi eketa tamo o Inaitiya.” ⁶ Fita bwaduna i bauwiya uğuna kasi tonu si matutamoka, na fasinei nofemaise i bwaduwa.

⁷ Munifotai busibusi i nemiya i kabwanisiya eketa busibusi sinenei Guyau fonana i kikinomana i bwaduwa, “Natuku nofe a nuwagabubuwiya, fonana kwana nowaniya.” ⁸ Tomuniyeina si kitadadana

eatu muka tamo aitevana sita kitai naki Yeisu kana kisina si kitiya.

⁹ Tovanama koyai si sobunemiya, i viketofotisiya be muka tamo aitevana sina iyavei avana si kitiya kana nivaniva Namōga Natuna mateyai ina misini-savaviniya.

¹⁰ Yana sawatana si muniiya, atu tututausiġa si vibutuwa si vivikanunusifusifufuwa, “Ava nofe misini-savavineina mateyai kana nuwanuwa?”

¹¹ Eketa Yeisu si nutoniya si bwaduwa, “Ava fasinei yo visime kana tovisawavenena si bwadubwadu Inaitiya ina mikinemai muniyai yo Togifafafana Gigibokeinana ina nemiya?”

¹² I nufata i bwaduwa, “Inaitiya ina mikinemiy ebe iba matatafuna ina omanafufuniya. Eatu Guyau fonakituna yota i bwadubwaduwa vitana Namōga Natuna o ina kuvavana nakasina eketa namōga sina utuvifwayafwaiya. ¹³ A iyaiyavimiya venemokena, Inaitiya naki i nemiya atu namōga si fufunakaokaoġowa nenei. Naki maise Guyau fonakituna i bwaduvioġoniya.”*

*Yeisu Kanunu Goyona I Nukakiya
Gwadimonamona Namōga Nenei*

Madiu 17:14-21, Nuke 9:37-43a

¹⁴ Tovanama si savavinisiya tomuniyeina tunisi nenesiyai, si kitisiya visime kana tovisawavenena nukusi si vivikawabwadubwaduwa namōga yagwanisi sinesiyai. ¹⁵ Tovanama sabuveka Yeisu si kitiya si sabanutuġa eketa si venufotefotiya.

9:11 Manakai 4:5, Madiu 11:14 * **9:13** Yeisu nofe i nunusifufuwa Yoni Togivibutabuta vitana tanake maise Inaitiya. (Madiu 11:13-14, 17:10-13)

16 I nutoniisiya i bwaduwa, “Avamasi kwa oovigwavigwaegei?”

17 Namoga tamokaaga sabuveka sinesiyai i bwaduwa, “Tovisawavenena, kanunu goyona natuku i nuwafiya eketa muka ita nunusifufu, na fasinei a nemiiya neneweue be kuna givibwiniya.

18 Tovanama kanunu goyona i gigivikaviniya, na kawatefutefunina i tuugatuugaiya fwayafwayai. Niguna i kikitanavikavikavina keta i fatofatokiya. Ka tomuniyeina a vikokonisiya be kanunu goyona sita nukakiya atu si vibaiwayosa.”

19 Yeisu i nufata i bwaduwa, “Kwami namoga avi tovai masi kwana vitumaaganeiku! Nukusi tana fakwakaoogo? Ana kunuwanekaoogoweimi? Gwadimonamona kwa nemiei nenekuwai.”

20 Eketa gwadimonamona si nemiiya Yeisu nenei. Tovanama kanunu goyona Yeisu i kitiya, gwadimonamona i nikuniya fifiwanina eketa i fekuwa fwayafwayai. Keta i vikenobwatabwataviniya na kawatefutefunina.

21 Yeisu gwadimonamona amana i nutoniiya i bwaduwa, “Namaise kana nubwayou nofemaise i fufufuna?”

Amana i nufata i bwaduwa, “Fwefweyanei i vibutuwa.

22 Kanunu goyona nuwanuwana be ina nuvimatiya na fasinei tamo tova i tuugatuugaiya kikanakanatai yota ukowai. Taki ka fata maise, kuta sineganiganiikiya be kuta ovivitikiya.”

23 Yeisu i iyaviya i bwaduwa, “Ava uguna yo ku iyaiyaveiku taki kaku fata maise? Tanake aitevana Guyau ina vitumaaganiya, Guyau iba matatafunina ina fufunisiya fasinei.”

24 Muka mwanenena eatu gwadimonamona namana amana i fina i bwaduwa, “Na yaku vitumağana eatu muka nakasina, ku oviviteiku be ku givinakasiya.”

25 Eatu Yeisu i kitisiya sabu si yokoyokwiya eketa kanunu goyona i visimeiya i bwaduwa, “Taniyakweu keta meyadanu kana kanunu goyona, a vivisimeiya namoğa kuna teweiya keta muka yota kuna kanasuna-savavineu.”

26 Kanunu goyona i tatakwayana eketa gwadimonamona i nikuniya fifiwanina keta i gionoviya. Gwadimonamonamokena kana fusa vitana namoğa matematena, eketa namoğa yagwanisi nokomai si bwaduwa, “Naki i mateya!”

27 Eatu Yeisu nimanei i ova i sinanakasiya eketa gwadimonamona i otowamisiniya.

28 Muninei Yeisu i kanasuna numai eketa kana kisina nenei kana tomuniyeina si nutoninuveviya si bwaduwa, “Ava uğuna muka kama fata kanunu goyona kata nukakiya?”

29 Eketa i iyavisiya i bwaduwa, “Naki kawanunukuğan nenei kana fata nofe kanunusima goyosi tana nukakisiya.”

Yeisu I Bwadu-savaviniya Yana Mate Fasinei

Madiu 17:22-23, Nuķe 9:43b-45

30 Yeisu tomuniyeina nukusi noko kabağanama si teweiya eketa si vaonota Ganiniyei. Yeisu muka nuwanuwana tamo aitevana ina sanamanei tanake namai, **31** be vitana nuwanuwana simo yana tova matanubwayouna ita viya be kana tomuniyeina nenesiyai ita visawavenisiya. I iyavisiya i bwaduwa, “Namoğan Natuna sina viwaifufuniya keta nifanifaina nimasiyai sina teniya keta

sina nuvimatiya, eatu kuyadayada tonusi muninei mateyai ina misini-savaviniya.”³² Nofemaise i nusifufuwisiya eatu muka nuwatasi ita mayesiya, si matuta eketa yana bwadunama fasinei muka sita nutonikuyekuye.

*Tomuniyeina Si Vikawabwadubwaduwa
Aitevana Nakatamokena Fasinei
Madiu 18:1-5, Nuke 9:46-48*

³³ Si kikinomana menana Kafenaumi nenei keta numa tamokaġa sinenei si kanasuna eyo Yeisu i nutoninuvenuvisiya i bwaduwa, “Avamasi ketai kwa vikanusifusifufuwei?”

³⁴ Atu matatafusi si manava uġuna ketai si vikawabwadubwaduwa aitevana sinesiyai nakatamokena.

³⁵ I fakwasiotogħa eyo yana tonowana kasi 12 i wenisiya si nemiya eketa i bwaduwa, “Taki aitevana nuwanuwana ina viketanuna nao tauna ina tenemuniukwaniya eketa ina vitovikaetogħa namoġa matatafusi fasisiyai.”

³⁶ Gwadimonamona i viya kasi kawasasai i vimisiniyya eyo i nutaviya eketa i iyavisiya i bwaduwa,³⁷ “Taki aitevana tamo nofe gwadimonamonanama maise ina katuviġa kaku wavai, nao ina katuvikuwa. Yota aitevana ina katuvikuwa nao muka Iyuġa ita katukatuvaiku eatu yota kaku tovininita i katukatuvija.”

*Taki Aitevana Muka Ita Vinifaineita,
Tanake O Kita Kata Sabu
Nuke 9:49-50*

9:34 Nuke 22:24 **9:35** Madiu 20:26,27, 23:11, Maka 10:43,44,
Nuke 22:26 **9:37** Madiu 10:40, Nuke 10:16, Yoni 13:20

38 Yoni Yeisu i iyaviya i bwaduwa, “Tovisawavenena, namōga ka kitiya kanunu goyosi i nunukakisiya ka wavai. Atu tanake o muka kata sabu, na fasinei ka iyaviya be ina onoviya.”

39 Atu Yeisu i bwaduwa, “Muka kwana sawatanai ūguna muka kana fata be tamo aitevana kaku wavai iba fifiwanina ina savivinei eatu kakimokimokima tu yota iba goyosi ina bwaduweisi fasikuwai. **40** Taki aitevana muka ina vinifaineita nao tana kata sabu. **41** A iyaiyavimiya venemokena, taki aitevana ukowa ina venimiya ūguna kwami kaku tomuniyeina, nao naki maisemoka fatana ina nisaiya.”

*Vimatasayasya Fasinei
Madiu 18:6-9, Nuke 17:1-2*

42 I tenesaviya i bwaduwa, “Nofe fiyagenagenasima kaku tovitumāgana, eatu taki aitevana go'yonā nenei ina weifikusiyā, nao Guyau vimatadawana nakatamokēna ina veniyanā. Muka maise gabana nakasina kayonei sina nusifwiya yo gibowai sina vigamomoniya. **43** Taki nimau go'yonā nenei ina teniwa, nao ku dabateweyei. Kana nufota be nimafafaniūga nenei kuna kanasuna yawasivāgata nenei muniyai yo nimau nuwesi nukusi kuna kanasuna kikanakanata muka yana kweunuwanuva kana kabāgai.† **45** Taki kaeu go'yonā nenei ina teniwa, nao ku dabateweyei. Kana nufota be kaeafafaniūga nenei kuna kanasuna

9:40 Madiu 12:30, Nuke 11:23 **9:41** Madiu 10:42 **9:43**

Madiu 5:30 † **9:43** Tunisi vigniniwa nenesiyai o kana nukisi 44 si nunatuya. Noko kabāganama nenei, ‘Mwatamwata muka simo yasi matenuvanuva namōga si kanikanisiya, yota kai kanakanata muka yana kafa kweu.’

yawasivağata nenei muniyai yo kaeu nuwesi nukusi sina tewesobuwiwa kabağanama nenei.[‡] **47** Taki matau go'yonai nenei ina teniwa, nao ku mwamwateweyei. Kana nufota be matafafana tamokağā nenei kuna kanasuna Guyau yana kafa visime nenei muniyai yo matau nuwesi nukusi sina tewesobuwiwa kabağanama nenei. **48** Noko kabağanama nenei, ‘Mwatamwata muka simo yasi matenuvanuva namoğā si kanikanisiya, yota kai kanakanata muka yana kafa kweu.’

49 Kaku tomuniyeina matatafusi dauna sina nisaisiya kikanakanata maise, eatu mwavinana o Guyau ina givieyaeisiya.

50 Gibo o iba dewadewana, atu tovanama kana onaona ina kakaviya, nao namaise tana nuvionaon-savavinei. Kwana fufuna maise kabwaga na gibona ina tava. Kwana fakwa na yami viyao.”

10

*Yeisu I Givisawakedana Visobu Fasinei
Madiu 19:1-12, Nuke 16:18*

1 Yeisu kabağā noko i teweiya eatu i niya kawakawana Yudiya nenei eketa i tamana ukowa Yonidani fafaninei. Sabuveka si nemi-savavinisiya nenei eketa naki kana iduwa maise i vibutuwa nenesiyai i gisawakedana.

2 Fanasi tunisi nuwanuwasi be Yeisu sina anuvanuviya na fasinei si nemiyi nenei

[‡] **9:45** Tunisi viginiwa nenesiyai o kana nukisi 46 si nunatuya. Noko kabağanama nenei, ‘Mwatamwata muka simo yasi matenuvanuva namoğā si kanikanisiya, yota kai kanakanata muka yana kafa kweu.’ **9:47** Madiu 5:29 **9:48** Aiseya 66:24 **9:50** Madiu 5:13, Nuke 14:34,35

eketa si nutoninuveiye si bwaduwa, “Namaise, yata visime namōga i sawateweiya be kawana ina visobuviya o muka?”

³ Eketa i nufata i bwaduwa, “Atu Mosese visime i venimiya o namaise i bwadu?”

⁴ Eketa si iyaviya si bwaduwa, “Mosese yana visime o namōga i sawateweiya ebe visobu kana nufunufu ina viginowiya eketa kawana ina veniya, muniyai yo gumayogu ina teweiya ina niya.”

⁵ Atu Yeisu i nufata keta i iyavisiya i bwaduwa, “Katekatemi yasi gua fasinei Mosese visime nofe i viginowiya fasimiyai. ⁶ Eatu kwana tukuya kafa viūguwai tovanama Guyau i kifufunavauvauwa, ‘Namōga keta gumayogu i fufunisiya.’ ⁷ Na fasinei namōga amana keta ayona ina teweisiya eatu kawana nukusi sina saviya tamo nenei, ⁸ eketa kasi nuwa sina vitamokāga.’ Eketa muka nuwesi eatu naki tamokāga. ⁹ Na fasinei keta avana Guyau i viketosaviya muka tamo aitevana ina nutakai.”

¹⁰ Tovanama si makavinisiya numai, Yeisu kana tomuniyeina si nutoninuve-savaviniya nofe ibanama fasinei. ¹¹ Eketa i iyavisiya i bwaduwa, “Taki namōga kawana ina visobuviya eatu tamo gumayogu ina vikawaniya nao naki i kudowa kawana nenei. ¹² Maise yota taki gumayogu kawana ina visobuviya, eatu tamo namōga ina vikawaniya nao naki i kudowa.”

*Yeisu Fiyagenagena I Sawanuwagabubuwisiya
Madiu 19:13-15, Nuke 18:15-17*

10:4 Visime Nuvinavinana 24:1-4, Madiu 5:31 **10:6** Kabikona 1:27, 5:2 **10:7** Kabikona 2:24 **10:11** Madiu 5:32, 1 Kononita 7:10,11

¹³ Tunisi namoḡa fiyagenagena si nemisiya Yeisu nenei ebe nimana ina dawana nenesiyai. Eatū kana tomuniyeina fiyagenagena amamasī keta ayoayosi si dageisiya ebe muka Yeisu sīna visinatamatamanei. ¹⁴ Tovanama Yeisu i kitīya avana i kikikinomana, i nuwagoyowa eketa i iyavisiya i bwaduwa, “Fiyagenagena kwana gionovisiya sīna nemiya nenekuwai. Muka kwana sawatanaisi. Uḡuna Guyau yana kafa visime o tasike aviyaonana maisemoka fiyagenagena nofe. ¹⁵ A iyaiyavimiya venemokena, taki aitevana Guyau yana kafa visime muka tamo ina katuvai maise gwadimonamona, muka kana fata ina kanasuna Guyau yana kafa visime nenei.” ¹⁶ Fiyagenagena i nutavisiya kavaunei eketa nimana i dawana debabousiyai, eketa i sawanuwagabubuwisiya.

*Namoḡa Tufunakasina Kaikaiwabuna Yeisu
I Nutoninuveviya Yawasivaḡata Fasinei*

Madiu 19:16-30, Nuke 18:18-30

¹⁷ Yeisu i noḡokawawa keta yana ketai i niniya, eatū namoḡa tamokaḡa i dibwana i niya kaetutuna i viketogunisiya eketa i nutoninuveviya i bwaduwa, “Tovisawavenena dewadewau, aviyavana ana fufuniya be yawasivaḡata ana nisaḡai?”

¹⁸ Eketa Yeisu i iyaviya i bwaduwa, “Ava uḡuna yo ku visawa-dewadewaiku? Naki Guyauḡa kana kisimokena dewadewana. ¹⁹ Kwaḡa naki ku sanamaniya Guyau yana visime. Muka kuna nuvimate, muka kuna kudo, muka kuna gikuma, muka kuna meyanono tamo aitevana

nenei, muka yasi nogonogomokeyai kuna nonoisi, yota amau keta ayou kuna vifotuwisiya.’”

20 Eatu namoğanama i bwaduwa, “Tovisawavena, kabegokuwai kana nivaniva kimoki visimesima matatafun a muniye-koğosisiya.”

21 Yeisu i kitantuwigabubuviya keta i iyaviya i bwaduwa, “Iba tamokağamoka yawane muka kuta fufuniya. Kuna makaviniwa ya nogonogo matatafun a kuna vikimwaneisiya eyo gabanna goyogoyo kuna venisiya, eketa Guyau kaikaiwabu abamai ina veniwa. Eyo kuna nemiya kuna muniikuwa.”

22 Namoğanama o kaikaiwabuna eketa tovanama nofemaise bwadubwadunama i nowaniya, tafakaina i kanawenonowa eketa i misiniya na nuwatadaunina i niya.

23 Yeisu i kitadadana eketa kana tomuniyeina i iyavisiya i bwaduwa, “Aviyaonana kaikaiwabusi nao yasi kanasuna Guyau yana kafa visime nenei daunamokena.”

24 Yana bwadunama fasinei kana tomuniyeina si mayağā eketa i iyave-savaviniya i bwaduwa, “Naturatuku, Guyau yana kafa visime kana kanasuna daunamokena. **25** Yomuyomu nakasina kameni o muka kana fata aimatana ina kanasunei. Naki maisemoka namoğā kaikaiwabuna o muka kana fata Guyau yana kafa visime ina kanasunei.”

26 Kawasi i yaowa keta tututausiğā nenesiyai si vikanunutoniya si bwaduwa, “Taki nanemaise nao aitevana gifafafana ina nisağai?”

27 Yeisu i toneisiya keta i bwaduwa, “Namoğā muka kasi fata be tututausi sina gifafafaneisi. Naki

Guyauṅga kana fata, uṄuna iba matatafunu Guyau nenei meyameyanina.”

²⁸ Eketa Fita i iyaviya i bwaduwa, “Ku nowaniya, atu kima namaise? Yama nogonogo matatafunu naki ka venuteweisiya munikiyai eatu ka munimuniwa.”

²⁹ Yeisu i bwaduwa, “A iyaiyavimiya venemokena, taki aitevana yana numa be unaunana, nounouna, ayona, amana, natunatuna eketa yana baguna ina venuteweisiya eatu ina muniikuwa be biga dewadewana ina yauniya fasikuwai, ³⁰ nao fatana nakasina Guyau ina vifofwiya 100 na kana vifofo keta ina veniya nofe tovanama. Yana numa be unaunana keta nounouna yota ayoayona be natunatuna eketa yana baguna ina nisaisiya keta yota namoṅga sina givikuvavaniya, eatu tova i nenemiya nenei yawasivaṅata ina nisaiya. ³¹ Atu yagwanisi aviyaonana nofe tova si viviketanuna nao sina vimunifota keta yagwanisi nofe tova si vivimunifota nao sina viketanuna.”

Yeisu Yana Bwadu Kana Vitonu Yana Mate Fasinei

Madiu 20:17-19, Nuke 18:31-33

³² Yeisu ke'ta i nuniya eketa kana tomuniyeina nukusi si vanevaneyā Yenusanema, kana tomuniyeina o si wagavana yota namoṅga tunisi si munimuniya o si matuta. Yana tonowana kasi 12 i katuvisiya eketa i vibutuwa i nusifufuwisiya iba matatafunu yawane ina kikinomana nenei fasinei. ³³ Yeisu i bwaduwa, “Kwa nowaniya, nofe naki ta niniya Yenusanema eketa nokomai tamo aitevana Namoṅga Natuna ina katuteweiya

Maka 10:34

liv

Maka 10:40

tovibwanaose nakanakasisi eketa visime kana tovisawavenena nenesiyai. Sina sawavimatiya eketa Kani Kwauna nimasiyai sina teniya.
34 Sina sawaviniyya yota sina nufunataniya. Sina nafanafasiya eketa sina nuvimatiya. Atu kuyadayada tonusi muninei mateyai ina misini-savaviniyya.”

*Yemesa Keta Yoni Yasi Vikokona
Madiu 20:20-28*

35 Tamo tova nenei Sebedi natunatuna Yemesa keta Yoni si nemiya Yeisu nenei eketa si bwaduwa, “Tovisawavenena, aviyavana kata vikokoniwa nuwanuwaki kuta fufuniya fasikiyai.”

36 Eketa i nutoninuveisiya i bwaduwa, “Avana nuwanuwami ata fufuniya fasimiyyai?”

37 Eketa si bwaduwa, “Tovanama ka kwabudoga na kana kaiwabu nenei kuna nuvitogā kuta sawateweiya be nukusi tata nuvitogā. Tamo kikikataiweu eatu tamo o kikimawaweu.”

38 Atu Yeisu i iyavisiya i bwaduwa, “Muka kwata sanamanei ava fasinei kwa vivikokoneiku. Kuvavana owana ana yumiya, kami fata maise yota kwana yumiya? O kami fata givibutabuta kwana viya maise sina givibutibutikuwa?”

39 Si iyaviya si bwaduwa, “Kama fata.”

Eketa i iyavisiya i bwaduwa, “Owanama ana yuwiyya nenei kwana yuwa, yota sina givibutibutikuwa maisemoka yota sina givibutibutimiya. **40** Eatu muka kaku sawateweina ebe ana gibokeisi aviyaonana kukikikataiku o kukikimawaku sina nuvitogā.

Guyau noko kivisima i gidewidewisiya aviyaonana naki i gibokisiya fasisiyai.”

41 Tovanama tonowana kasi 10 si nowaniya Yemesa eketa Yoni yasi vikokona Yeisu nenei si kayokuğā nenesiyai. **42** Yeisu yana tonowana matatafusi i wenevakukusisiya eketa i iyavisiya i bwaduwa, “Kwami naki kwa sanamaniya. Aviyaonana Kani Kwauna kasi tovisime nuwanuwasi be yasi namonamoğā sina vivisimeisiya, keta yota yasi namoğā nakanakasisi visime daudaunisi nenesiyai si viviketanunisiya. **43** Atu kwami o muka noko ketaketanama nenei kwana fufuna. Taki aitevana tamo sinemiyai nuwanuwana ina vikainakata, nao ina vitovikaetoğā fasimiyai. **44** Taki sinemiyai aitevana tamo nuwanuwana ina viketanuna, nao tanake ina vitovikaetoğā matatafumi fasimiyai. **45** Maisemoka Namoğā Natuna muka ita nemai ebe namoğā sina vikaetoei, eatu i nemiya be namoğā ina vikaetisiya eketa tauna yana nuwanuwai yawasina ina kaveneniya be namoğā yagwanisi ina tutuvisobusiya.”

Yeisu Batimiyyosi Matana I Gidewidewisiya

Madiu 20:29-34, Nuke 18:35-43

46 Yeisu kana tomuniyeina nukusi si kikinomana Yeniko eketa tovanama noko mananinama si teweiya, namoğā sagisagigi si muniisiya. Namoğā tomatagoyo kana wava Batimiyyosi, Timiyosi natuna, ke'ta kafakainei i nuvitoğā atu gabana fasinei i vivikokona. **47** Tovanama i nowaniya namoğā si bwaduwa Yeisu tene Nasaneti i niniya

eketa i bwauwa i bwaduwa, “Yeisu, Deivida natuna, kuta kitasineganiganikuwa.”

48 Namoga yagwanisi si dageiya keta si iyaviya be ina kanoviya.

Eatu i tenegwaeiya kayona nakasinei i bwaubwauwa, “Yeisu, Deivida natuna, kuta kitasineganiganikuwa.”

49 Yeisu i nigwana eketa i bwaduwa, “Kwa iyavei be i nemainofemai.”

Eketa tomatagoyo si weniya si bwaduwa, “Katekateu i vatu be ku otowamisini! Yeisu i weneweniwa.”

50 Batimiyosi kana kwame i nukasibibiya eatu i venuotowamisiniya eketa i nemiya Yeisu nenei.

51 Yeisu i iyaviya i bwaduwa, “Ava ya nuwanuwa ata fufuniya fasiweu?”

Eketa tomatagoyo i nufata i bwaduwa, “Tovisawavenena, nuwanuwaku ana toneya.”

52 Yeisu i iyaviya i bwaduwa, “Ku nai, ya vitumagaña i givibwiniwa.” Muka mwanenena atu matana si kabwasasa eketa i vibutuwa Yeisu i muniya ketai.

11

Yeisu I Kanasuna Yenusanema

Madiu 21:1-11, Nuke 19:28-40, Yoni 12:12-19

1 Tovanama Yeisu kana tomuniyeina nukusi Yenusanema si vevenukitekiya, si nemiya menana Betifegi keta Bedani nenesiyai koya Onive nenei. Yeisu kana tomuniyeina nasi nuwa i visimeisiya keta si venuviketanuna. **2** I iyavisiya i bwaduwa, “Kwana niya menana kutafakaita. Tovanama kwana kikinomana nokomai, kwana nisaiya doniki mwanavauna si nusikwaniya muka tamo

aitevana ita toğ-a-nuvanuvai. Kwana giyauya eketa kwana nemiiya.³ Taki aitevana ina bwaduwa, ‘Ava uğuna kwa gigiyauya?’ Nao kwana iyaviya kwana bwaduwa, ‘Tuveka nuwanuwana fasinei, eyo ina venuviyewiyanofemai.’”

⁴ Tonowana kasi nuwa si kanasuna menana sinenei, eketa doniki mwanavauna si kitiya ketai i misimisiyi nunusikwanina numa kana ketakawana niniunei. Tovanama si gigiyauya,⁵ namoğa tunisi niniunei si misimisiyi si nutoninuvenuveisiya si bwaduwa, “Ava fasinei yo doniki mwanavauna kwa gigiyauya?”⁶ Eatu namoğa nenesiyai si nufata naki maisemoka Yeisu i iyavisiya, na uğuna si sawateweisiya.⁷ Tovanama doniki mwanavauna si nemiiya Yeisu nenei, kasi kwame si tewevanevaneina doniki kwaunei eketa i toğatakutakunisiya.

⁸ Namoğa yagwanisi kasi kwame ketai si kiyavena eatu tunisi o kai nağanisi na dadasi si nuonota eketa si kiyavena.⁹ Eketa namoğa si viketanuna kunauna yota muni si fotiya, si vibutuwa si bwaubwauwa,

“Osana!*

Tuveka kana wavai i nenemiya tana daviya.

¹⁰ *Tana daviya wağata Deivida natuna tanake i nenemiya ina visimeita,
Osana etanemokenei abamai!”*

11:9 Same 118:25,26 * **11:9** Osana o Aneimiki fonasi, naumokena nenei bwadunama kana givina nofe tova ku gifafafaneiki, eatu munifotai namoğa kasi okatuyuna keta yota namoğa sina davisya kana tovai nofe bwadunama si kinakinaniya.

11 Yeisu i kanasuna Yenusanema eketa i niya Numa Kodukodu nenei. Iba matatafunu i dadaniya eatu naki i vinavinavimoka, na fasinei yana tonowana kasi 12 nukusi si kikinomana eketa si niya Bedani.

*Yeisu Kai Nugweda I Ituya
Madiu 21:18-19*

12 Kuyadayada venuwanei Yeisu kana tomuniyeina nukusi tovanama Bedani si teweiya, Yeisu vitanona i kanasiya. **13** Kedawanauwai kai nugweda i vidada i kitiya eketa i niya vitana tamo uwana ina nisaiya, eatu kainama o muka kana tutuya ebe ina viuwa na fasinei dadanağā i kitiya. **14** Eketa Yeisu kai i iyaviya i bwaduwa, “Mukamokena tamo aitevana uwau nenei ina kasavavinei.” Eketa bwadunama kana tomuniyeina si nowaniya.

*Yeisu Numa Kodukodu I Givieyaeiya
Madiu 21:12-17, Nuke 19:45-48, Yoni 2:13-22*

15 Tovanama si nemiya Yenusanema, Yeisu i kanasuna Numa Kodukodu kumenanina kana wasiketai keta tovikimwane i nukwavikwavina si kikinomana. Gabana kana todawanata-matamaneina yasi sonama yota bunebune kasi tovikimwane yasi kafa nunuvitōğā i nubwatabwatavina, **16** eketa i viketofotisiya be muka tamo aitevana aviyavana tamo ina kanasunei ina vaonota Numa Kodukodu kumenanina kana wasiketai. **17** Eketa i gisawakedanisiya i bwaduwa, “Kwa sanamaniya Guyau fonakituna i bwaduwa, ‘Yaku numa sina weniya

*kawanunuku kana numa kunuma matatafusi
fasisiyai.’*

*Atu kwa fufuniya maise ‘togikuma yasi kafa
makaviuna.’”*

¹⁸ Tovibwanaose nakanakasisi eketa visime kana tovisawavenena nofe bwadunama si nowaniya. Eketa ketaketa si nuwasa ebe sina nuvimiatiya. Si matutiya uğuna yana gisawakedana nenei sabuveka si mayağā.

¹⁹ Tovanama i vivinavinaviya, Yeisu kana tomuniyeina nukusi Yenusanema si teweiya.

Kai Nugweda I Teweyayaniya

Madiu 21:20-22

²⁰ Nuwabuniyai si makamakavinisiya eatu si kitiya kai nugweda kikwanakwanaminei tu i vaneya dadanei naki i teweyayaniya. ²¹ Fita Yeisu yana bwadu i tukuya eketa i iyaviya i bwaduwa, “Tovisawavenena, ku kitai! Kaima ku ituya naki i teweyayaniya!”

²² Yeisu i iyavisiya i bwaduwa, “Guyau kwa vitumağanei. ²³ A iyaiyavimiya venemokena, taki aitevana tamo nofe koya ina iyaviya, ‘Ku sinanakasiu be ku tewesobuweu gibowai,’ eketa muka katekatenei ina vinuwana eatu ina vitumağaniya avana i bwaduwuya naki maisemoka ina kikinomana, nao Guyau ina fufuniya fasinei. ²⁴ Na uğuna a iyaiyavimiya, taki aviyavana tamо fasinei kwana kawakawanunuwa eketa kwana vitumağaniya vitana naki kwa nisaiya, nao ina venimiya. ²⁵ Tovanama kwana kawakawanunuwa, nauna aitevana yana

fufunagoyo nenemiyai kwana vinuwateweiya eyo muniyai, amami abamai yami go'yona yota ina vinuwateweina.”†

*Yeisu Yana Visime Kana Nutoninuvuvenuveyeina
Madiu 21:23-27, Nuke 20:1-8*

²⁷ Yeisu kana tomuniyeina nukusi si makavinasavavinisiya Yenusanema eketa tovanama i wanewaneba Numa Kodukodu kumenanina kana wasiketai, tovibwanaose nakanakasisi keta visime kana tovisawavenena yota tokawakawa si nemiya nenei, ²⁸ eketa si nutoninuvuvenuveiya si bwaduwa, “Aitevana ya visime i veneu yo nofemaise ku savivinei? Namai ya visime ku vai?”

²⁹ Yeisu i iyavisiya i bwaduwa, “Nutoninuvuvenuveyeina tamokaña ana venimiya ebe taki kwana fatiya maise, nao ana iyavimiya avi visime nenei nofe ibasima a savisavivineisi. ³⁰ Kwa iyaveiku, Yoni namai yana visime i vai yo i givibutabuta, abamei o namoña nenesiyai?”

³¹ Tututausiña si vikanunutoniya si bwaduwa, “Taki tana bwaduwa, ‘Abamei,’ nao ina bwaduwa, ‘Ava fasinei yo Yoni muka kwata vitumagañanei?’

³² Yota muka kata fata be tana bwadu, ‘Namoña nenesiyai.’” Sabuveka si matutisiya uguna namoña si sanamaniya vitana Yoni o Guyau yana tomatakawa. ³³ Eketa si nufata Yeisu nenei si bwaduwa, “Muka kata sanamanei.”

Eketa i iyavisiya i bwaduwa, “Muka yota ana iyaveimi avi visime nenei nofe ibasima a savisavivineisi.”

† **11:25** Tunisi viginiwa nenesiyai o kana nukisi 26 si nunatuya. Eatū taki kuna dibutoyoña be muka kuna vinuwateweyei nao Amau abamai ya go'yona muka ina vinuwateweyeisi.

12

*Tobaguna Kasi Bwadusobusobu
Madiu 21:33-46, Nuke 20:9-19*

¹ Eketa Yeisu bwadusobusobuwai i iyavisiya i bwaduwa, “Namoṅga tamokaṅga genefi i baguniya eketa i kanififiya. Genefi kana kafa vatanitani kana doko i yaniya yota kafa vimatagewagewaya kana numa i yoniya. Genefi bwibwiyaguna i tenetaniya keta tobaguna nimasiyai i teniya, atu i niya tamo fafani nenei. ² Oyuna kana tovai kaetoṅga tamokaṅga i visimeiya i niya tobagunasima nenesiyai be kana tuku ina viya. ³ Eatu tobagunasima kaetoṅga si tabiya eketa si munuya eyo si viyewiya makaekaena. ⁴ Kaetoṅga kana vinuwa i teweeye-savaviniya nenesiyai, eatu debabounei si munuya eketa si givisinemumuya. ⁵ Tonibaguna kaetoṅga kana vitonu i visimeiya eatu si nuvimatiya. Yota yagwanisi i teweisiya atu tamokaṅga fufuninama si fufuniya, tunisi si munusiya atu tunisi o si nuvimatisiya.

⁶ Naki tamokaṅgamoka i tufowa o tauna natukatekatena. Tovanama i visimeiya tobagunasima nenesiyai, nuwasinenei i bwaduwa, ‘Nofe o natuku eketa sina vifotuwiya.’

⁷ Tobagunasima tututausi si vikanunutoniya si bwaduwa, ‘Ake, tonibaguna natuna i nenemiya. Kwa dibwana, ta nuvimatei ebe yana baguna tana vitoniwagiya.’

⁸ Gwadinama si givikaviniya si nuvimatiya eyo genefi baguna nenei si tewekikinomaniya.”

9 Eketa Yeisu i nutoninuveuniye i bwaduwa, “Namaise yami vinuwadadana? Tonibaguna ava ina fufuniya nenesiyai? A iyaiyavimiya, ina nemiya eketa ina nuvimatisiya. Eatu bagunanama ina tenetamaniya tamo yota tobaguna nimasiyai.
10 Guyau fonakituna i bwaduwa,

*Koğonanama tokiyona si dibutoyoiya
 i visabuova.*

11 *Tuveka nofemaise i saviviniya
 keta kana kita dewabauna matatiyai.’ ”*

12 Diu toviketanuneina si sanamanemokiya Yeisu fasisiyai i nusifufuwa na fasinei ketaketa si nuwasa be sita givikaviniya, eatu sabuveka si matutisiya eketa si kitamokiya i fakwa atu si kafiyauyauna.

*Takesi Kana Nufata Sisa Nenei
 Madiu 22:15-22, Nuke 20:20-26*

13 Munifotai, Diu toviketanuneina tunisi Fanasi eketa Enoda kana tomuniyeina si visimeisiya Yeisu nenei vitana sina tonisebiya be tamo aviyavana ina bwaduwe-goyowiya. **14** Si nemiya nenei eketa si bwaduwa, “Tovisawavenena, ka sanamaniya kwağga namoğga venemokena. Muka tamo aitevana yana nusuyai kuta ninai yota Guyau yana ketaketa venemokena nenei ku vivisawavenena. Yaması ku iyaveiki, takesi kata nufata Sisa nenei o muka?”

15 Yeisu naki i sanamanemokiya vitana si aanuvanuva be sina nonuya na fasinei i iyavisiya i bwaduwa, “Ava fasinei kwa aanuvanuva be kwana vikonaiku? Yaması tamo gabana

kwa nemiyei be a kitai.” 16 Tovanama si nemiiya nenei i iyavisiya i bwaduwa, “Aitevana mayamayauna eketa kana wava nofe gabana nenei?”

Si bwaduwa, “Sisa.”

17 Eketa i iyavisiya i bwaduwa, “Make nao Sisa yana nogonogo kwa venei, eatu aviyavana Guyau fasinei nao Guyau kwa venei.”

Yana nusifufu nenei si mayaǵa.

*Sadusi Tunisi Yeisu Si Nutoninuveviya
Misini-savavineina Fasinei
Madiu 22:23-33, Nuke 20:27-40*

18 Sadusi si vitumaǵana vitana mate nenei muka tamo misini-savavineina. Eketa tunisi si nemiya Yeisu nenei eketa si nutoninuveviya si bwaduwa,

19 “Tovisawavenena, Guyau yana visime Mosese nofemaise i viginiwiya fasikiyai. Taki namoǵa kawana ina matemakanoviya eatu muka tamo natunatuna, nao kwafunina kana tufunuwa ina vikawaniya. Eketa tovanama ina vinatuna, nao tomate natunatuna. 20 Tova tamokaǵa namoǵa tufudenideni kasi 7 nenesiyai, kotokikinuna i vikawana eketa muka tamo natunatuna eatu i mateya.

21 Eketa gwadiyei yota nekwafunanama i vikawaniya eketa muka tamo natunatuna eatu i mateya. Yota taisi kotokinena i vikawaniya eketa muka tamo natunatuna eatu i mateya.

22 Tufudenidenisi kasi 7 nekwafuna si vikawaniya. Eatu muka tamo natunatusi atu si mateya. Munifotamokeyai nekwafunanama i mateya.

23 Kasi 7 nekwafunanama si vikawaniya eketa

misini-savavineina kana tovai, aitevana o kawana venemokena?”

²⁴ Yeisu i nufata i bwaduwa, “Kwa sinatamaniya uğuna muka kwata sanamanei Guyau fonakituna keta yota muka kwata sanamanei Guyau yana fiwana. ²⁵ Tovanama mateyai sina misini-savavinisiya, muka sina vikawana atu sina fakwa naki maise Guyau kana kaetoğā abamai.

²⁶ Atu mateyai yasi misini-savavineina fasinei, muka kwata ginağanağai Mosese yana nufunufu kisisiku nununuina fasinei? Noko viginiwanama sinenei Guyau i nusifufuviya i bwaduwa, ‘Iyau o Ebenaamu yana Guyau, Aisake yana Guyau, eketa Yakobo yana Guyau.’ ²⁷ Eketa tanake o yawayawasisi yasi Guyau atu muka matematesi.* Naki kwa sinatamaniya venemokena.”

Visime Nakatamataina

Madiu 22:34-40, Nuke 10:25-28

²⁸ Visime kana tovisawavenena tamokağā i nemiya keta i nowanisiya Yeisu keta Sadusi si vivikawabwadubwaduwa. Tovanama i nowaniya Yeisu yana nufata kana dewadewana, i nutoninuveviya i bwaduwa, “Guyau yana visime nenei, avi visime o nakatamataina?”

²⁹ Yeisu i nufata i bwaduwa, “Visime nakatamataina o nofe, ‘Isineni kwa vaneneğā! Tuveka o yata Guyau eketa kana kisimokena Tuveka. ³⁰ Eketa Tuveka ya Guyau kuna nuwagabubuviya

^{12:26} Yauna 3:6 * ^{12:27} Yeisu yana uğu noko vitana Guyau taki ita givimayesiya tauna fasinei wağawağana tonusi yasi Guyau, eketa naki tasike yawane na yawasisi Guyau i nusifufuwa Mosese nenei eketa tasike naki sina misini-savavinisiya. ^{12:28} Nuke 10:25-28

^{12:29} Visime Nuvinavinana 6:4,5

katekateu matatafunei, yawasiu matatafunei be ya nuwanuwa matatafunei yota ya fiwana matatafunei.’³¹ Eyota visime kana vinuwa nao, ‘Unafafaniu kuna nuwagabubuviya maise tauğu ka nuwagabubu.’ Nofe nuwesi o nakatamataisi yo muniyai visime yagwanina.”

³² Eketa visime kana tovisawavenena i bwaduwa, “Tovisawavenena, ku bwaduwa dawaniniina. Bwadu venemokena tanake kana kisimokena yata Guyau eketa muka tamo yota aitevana. ³³ Yata Guyau tana nuwagabubuviya katekateta matatafunei yota yata nuwanuwa matatafunei be yota yata fiwana matatafunei. Eketa unafafanita tana nuwagabubuviya maise tututauta kata nuwagabubu. Nofe visime nuwesi kasi muniyeina o nakatamokena muniyai yo yata vibwanaose keta yomuyomu kasi gumatatafu Guyau nenei.”

³⁴ Tovanama Yeisu i kitiya namoğga i nusifufuwa na yana nuwatasanamana, i iyaviya i bwaduwa, “Kwağga o muka ka kedawanau Guyau yana kafa visime nenei.” Noko muninei muka tamo aitevana ita katevatu be tamo nutoninuvuveyeina Yeisu ita venei.

Aitevana Natuna o Togifafafana Gigibokeinana?

Madiu 22:41—23:36, Nuke 20:41-47

³⁵ Yeisu i gigisawakedana Numa Kodukodu kumenanina kana wasiketai eatu i bwaduwa, “Namaise yo visime kana tovisawavenena si bwadubwadu vitana Togifafafana Gigibokeinana

12:31 Visime Tafu 19:18 **12:32** Visime Nuvinavinana 4:35

12:33 Oseye 6:6

o Deivida natuna? ³⁶ Kanunu Tafutafuna Deivida i viketiiya ketanofemaise i bwaduwa,

*'Guyau yaku Tuveka i iyaviya i bwaduwa,
"Kukikikataiku ku nuvitogā vifotu kabaina nenei
kana nivaniva nifanifaiu ana vatanisiya keta
kaeyafayafaweu ana tenisiya."'*

³⁷ Deivida tauna o Togifafafana Gigibokeinana nenei i visawatuveka eketa namaise yo nenei yota ita visawanatuna?" Yana nusifufuwai sabuveka nuwatasi i oviya.

³⁸ Yeisu yana gisawakedana nenei yota i bwaduwa, "Matami ina kanakasiya visime kana tovisawavenena nenesiyai. Yasi waneba nenesiyai, nuwanuwasi nuya dewabausi sina kotokotonisiya. Nuwanuwasi sabu namoḡa vifotuwai sina venuvenuyofiyofisiya kabaḡa kafa vivitamaneina nenesiyai. ³⁹ Yota nuwanuwasi kivi dewadewasiḡa numa kafa yokoyoko sinesiyai, maise yota ka kana tovai nuwanuwasi kawakawa kasi kivi nenesiyai sina nunuvitogā. ⁴⁰ Yasi kawanunuku o nubwanubwayousi ebe namoḡa sina davisija, eatu tasike namoisima o vivinekwafukwafuna yasi numa kasi nogonogo si kakanema. Guyau ina vimatadawanisiya nakatamokena."

Nekwafuna Yasi Kavenenakaoḡo

Nuke 21:1-4

⁴¹ Numa Kodukodu kumenanina kana wasiketai Yeisu kavenenakaoḡo kana koni kutafakainai i fakwasiotogā eatu sabu i vivinanusiya yasi gabana

si kikivitotoğā. Namoğā yagwanisi kaikaiwabusi yasi gabana nakanakasisi si dawana. ⁴² Eatū negoyogoyo nekwafuna si nemiya keta gabana nuwesi musumususi si totoisiya.

⁴³ Eketa kana tomuniyeina i wenisiya si nemiya keta i iyavisiya i bwaduwa, “A iyaiyavimiya venemokena, negoyogoyo nekwafuna o yasi kavenenakaoğō nakatamataina muniyai yo namoğā matatafusi. ⁴⁴ Uğuna namoğā kaikaiwabusi o yasi gabana matatafumokena i fakwa atu kasiminağā si teniya yasi kavenenakaoğō fasinei, eatu noko negoyogoyomoka o yasi kinofe tausi kasi ovivita fasinei, matatafumokena si nubutuya.”

13

Yeisu I Nusifufuwa Numa Kodukodu Kana Kiyak-wena Fasinei

Madiu 24:1-2, Nuke 21:5-6

¹ Tovanama Yeisu Numa Kodukodu sinenei i kikinomana, kana tomuniyeina tamokağā i iyaviya i bwaduwa, “Tovisawavenena, numa nofe dewabausi ku kitaisi keta yota gabana kitagoyosi nenesiyai si kiyona.”

² Eketa Yeisu i bwaduwa, “Numasima nofe kitagoyosi ku kitikitisiya o yawane matatafusi sina yakwena-kögoisiya. Muka tamo gabana ina tufo naki matatafuna sina tewesobuwe-kögoiya.”

Dauna Keta Kuvavana

Madiu 24:3-14, Nuke 21:7-19

³ Yeisu koya Onive nenei i nuvitoiya eketa i kitatamana Numa Kodukodu kuweyaina. Tovanama nenei, Fita, Yemesa, Yoni eketa Anideneya tasikeğā si nemiya si nutoninuveviya

si bwaduwa,⁴ “Yamasi kuta iyavikiya, nofe ibasima ku iyaiyavikiya o avi tovai sina kikinomana. Avi kiyakiyaya nenei kana sanamanei vitana nofe ibasima o kabegomokena sina kikinomana?”

⁵ Eketa Yeisu i iyavisiya i bwaduwa, “Matami ina fekuwa ebe muka tamo aitevana ina nonoimi.⁶ Yawane namōga yagwanisi sina nemiya eketa kaku wavai sina bwaduwa, ‘Make iyau togifafafanamokeku.’ Nofe nenei yawane namōga yagwanisi sina nonusiya.⁷ Muka kwana katekuvavana taki aviya bigana kwana nowaniya ketamwakufwai o kedawanauwai. Nofe ibasima o sina mikikikinomana eatu nai o muka vitana tova kana kafa nusafu.⁸ Tamo kunuma ina misiniya keta tamo kunuma ina vikaniyabiniya. Yota tamo kafa visime ina misiniya keta tamo kafa visime ina vikaniyabiniya. Yawane nikuniku ina kikinomana kabāga tunisitunisi nenesiyai. Yota noga ina kikinomana. Nofe ibasima nao maise vinatuna kana kuvavana kana kafa viūgu.

⁹ Tututaumi kwana kitavikavina-dewidewimiya. Namōga sina givikavinimiya keta menana kasi toviketanuneina nimasiyai sina tenimiya. Yota numa kafa yokoyoko nenesiyai sina munumiya. Yawane kasi tovisime keta tufomu nausiyai sina vimisiiniymiya eatu sina vinuesanimi ya ūguna kwami kaku tomuniyeina. Nokomai wakakaku kwana siya nenesiyai.¹⁰ Muniyai yo kafa nusafu, nauna biga dewadewana kaku tomuniyeina sina yauniya kunuma matatafusi nenesiyai.

¹¹ Tovanama sina givikavinimiya eketa sina vinuesanimi ya, muka kwana nuwanuwa

avyiyavana kwana nusifufuviya fasikuwai uğuna kwami muka tututaumi yami nuwanuwai kwana nusifufu. Eatu Kanunu Tafutafuna yami nusifufu ina gidawadawaniniya. Na fasinei keta avana Guyau ina venimiya maise, naki kwana bwaduwe-kikinomaniya.

12 Namoga tauna kana tufunuwa ina viwaifufuniya eketa nifanifaishi sina nuvimiatiya. Ama naki maisemoka tamoka fufuninama nenei natuna ina dewiya. Natunatu sina misiniya ayoayosi be amamasii nenesiyai sina maniniya eketa sina viwaifunisiya kasi nuvimate fasinei.
13 Namoga matatafusi sina adibutoyotoyoimya uğuna Iyau kwa munimuniikuwa. Eatu taki aitevana ina kunuwaniya be ina muniikuwa kana nivaniva kafa nusafu, nao tanake Guyau ina gifafafaniya.”

*Kuvavana Nakasina Kana Tova
Madiu 24:15-28, Nuke 21:20-24*

14 “Tovanama iba goyomokena kwana kitiya kabaga vivikanatafunu nenei namai muka kana nufota nenei ina misini atu nenei i misimisiniya, (Nufunufu nofe kana toginağanağga kwata nuwatasanamaniya avana a bwadubwaduviya.) enao aviyaonana fafani Yudiya nenei si fakwafakwa sina dibwana koyai. **15** Eatu taki aitevana yana numa kana kudukudu etanei ina fakwafakwa, nao muka ina kanasuna numa sinenei yana nogonogo ina vaisi, **16** maisemoka yota aitevana yana bagunai ina bagubaguna, muka ina makavinai numai kana kwame fasinei. **17** Noko tovanama nenei vivisifuga keta tovisusu

sina vimainuwinuwiya venemokena. **18** Eatu Guyau nenei kwana kawakawanunuwa be nofe ibasima muka tutuya goyonei sina kikinomana. **19** Noko tovasima nenesiyai kuvavana nakasina ina kikinomana, muka tamo maise kuvavanana ita kikinomana tovanama Guyau fwayafwaya i fufunavauvauya kana nivaniva kimoki. Yawane nofemaise kuvavanana ita muka yota ina kikinomana-savavinei. **20** Eatu noko tovasima o Tuveka naki i givibwatisiya. Taki muka, nao namōga matatafusi sita matekooḡa. Eatu i givibwatisiya ebe nuwanuwana aviyaonana i gibokisiya tauna fasinei ina gifafafanisiya.

21-22 Yawane togifafafana gigibokeinana keta tomatakawa vikanonono sina nemiya keta kiyakiyaya kafa nuwatabau sina savivinisiya. Ebe taki kasi fata maise Guyau yana namonamōga gigibokeinasi nuwatasi sina kaniya. Taki tamo aitevana ina iyavimiya ina bwaduwa, ‘Ei, nofe Togifafafana Gigibokeinamokena,’ o taki ina bwaduwa, ‘Ake, noko namōgamokena.’ Nao muka bwadunama kwana vitumāganei. **23** Eketa matami ina fekuwa. Eatu a matamatakawevagasimiya ebe yo na yami gidewadewa tovanama ibasima sina kikinomana.”

Namōga Natuna Yana Makavina

Madiu 24:29-31, Nuke 21:25-28

24 “Noko tovasima nenesiyai tovanama kuvavana nakasina ina kakaviya.

Vanavana ina vikumanovana

13:19 Daniyena 12:1, Kenokita 7:14 **13:24** Aiseya 13:10, Isikeni 32:7, Yoweni 2:10, 31, 3:15, Kenokita 6:12

*keta yota yamayamana muka ina tafa.
 25 Abamei kinavinavi sina kafifekufikuwa
 keta yota iba fifiwanisi abamai
 ina kayufeyufisiya.'*

26 Tovanama nenei Namōga Natuna sina kitiya busibusi nenei ina nenemiya na yana fiwana nukusi keta na yana kaiwabu. **27** Eyo Guyau kana kaetōga abamei ina visimeisiya sina niya. Bomatuwei, gagasei, nanakoyei keta yavanatei, fwayafwaya be abama bwatanei tu bwatanei yana namonamōga gigibokeinasi sina katuvivisiya tamokāga.”

*Kai Nugweda Kana Bwadusobusobu
 Madiu 24:32-35, Nuke 21:29-33*

28 “Kafa kita o kai nugweda nenei kwana kitasanamaniya. Tovanama nāganina mwanavauna sina vikiviavenna nao kwa sanamaniya nugutabo kana tova i niketamwakufwa. **29** Naki maisemoka tovanama nofemaise ibasima kwana kitisiya sina savisavivina nao kwa sanamaniya Namōga Natuna yana nemi naki i niketamwakufwamoka. **30** A iyaiyavimiya venemokena, nofe susunama yasi tovai nofe ibasima sina mikisavivina muniyai yo sina kafimatemateya. **31** Abama keta fwayafwaya sina kaōgoniya atu fonaku muka ina kaōgoniya.”

*Muka Tamo Aitevana Ina Sanamanei
 Kana Kuyadayada O Kana Kawasasa
 Madiu 24:36-44*

13:25 Aiseya 34:4, Yoweni 2:10, Kenokita 6:13 **13:26** Daniyena 7:13, Kenokita 1:7

³² “Muka tamo aitevana ita sanamanei kana kuyadayada o kana kawasasa avi tovai ibasima nofe sina savivina, mukamokena Guyau kana kaetōga abamai o taki Natuna tauna. Naki Amanāga i sanamaniya. ³³ Kuna tonetoneya keta kuna gigidewadewa ūguna muka kuta sanamanei kana tovamokena.

³⁴ Naki maisemoka tovanama namōga tamo yana numa ina venuteweija eatu ina niya kedawanauwai, kana kaetōga tamokatamokāga yasi mudadava ina kavenena yota kawa kana tokitavikavina ina iyaviya be ina kitakitanufota. ³⁵ Kwami yota naki maisemoka kwana kitakitanufota, ūguna muka kwata sanamanei toninuma yana makavina. Taki ina nemiya navinaviyai o kamo nuwabuna sinefouna o kamo kamukamu yasi kwae kana tovai o taki tovakatakiyai. ³⁶ Kwana gigidewadewa ebe tovanama ina nikikinomana muka ina nisāgaimi kwana banubanu. ³⁷ Avana a iyaiyavimiya, naki maisemoka yota namōga matatafusi a iyaiyavisiya, ‘Kwana tonetoneyal!’ ”

14

*Diu Toviketanuneina Si Viwaifufuna Be Yeisu
Sina Nuvimatiya*

Madiu 26:1-5, Nuke 22:1-2, Yoni 11:45-53

¹ Naki kuyadayada nuwesimoka muniyai yo Venuvisinatana keta Maneka Muka Nakana Nutuva Kana Ka ina nisaiya. Tovibwanaose nakanakasisi keta visime kana tovisawavenena

ketaketa si nuwasa be Yeisu sita givikavina-samwagauwiya ebe sita nuvimiatiya. ² Si bwaduwa, “Muka ka kana tovai tana givikaviniya, akata namōga sina nuwagoyowa keta vigwaēga sina vibutuya.”

*Gumayogu Bubu Mamadina I Siwaiya
Yeisu Debabounei Menana Bedani Nenei
Madiu 26:6-16, Nuke 22:3-6, Yoni 12:1-8*

³ Yeisu i niya Bedani namōga kana wava Saimoni yana numai. Namōganama o nauna kwafinina gosagosawina. Nokomai si kakawa atu gumayogu tamokāga bubu mamadina yota fatana kitagoyona kana wava nadi na konina i kanasunanemiya. Kana koni si fufuniya anabasita nenei. Kayona i gikotoviya keta bubunama Yeisu debabounei i siwaiya.

⁴ Aviyaonana namōga nokomai si kayokūga keta tututausi si vikagigigamana keta si bwaduwa, “Ava ūguna yo bubu noko mamadina i vivinuwateteweyei? ⁵ Kana nufota be manamana tamokāga tobunanige fatana 300 siniva maise nenei ita vikimwaneiiya keta gabandinama goyogoyo ita venisiya.” Eketa si dageiya.

⁶ Atu Yeisu i iyavisiya i bwaduwa, “Kwa tenei nuwatanei be ava i fufufuniya o i fufuniya. Nofe o iba dewadewana i fufuniya nenekuwai. Atu ava fasinei yo kwa visinamatamanei? ⁷ Kwami tova matatafuna goyogoyo nukusi kwa fakwafakwa eketa avi tovai nuwanuwami maise enao kwana ovivitisija. Eatu Iyau o muka tova

matatafunu nukusi tana fakwafakwa. ⁸ Avana kana nufotai maise naki i fufuniya. Bubu mamadina tofwakuwai i siwaiya be tofwaku i gidewadewavağasiya kaku odewadewa fasinei. ⁹ A iyaiyavimiya venemokena, tovanama biga dewadewana fasikuwai fwayafwaya kana matatafu sina yauniya, avana gumayogu nofe i fufuniya nenekuwai yota kana kafa tuku fasinei sina numamaniya.”

¹⁰ Noko tovanama nenei Yudasa Isikaniyoti tanake tamokağä tonowana kasi 12 sinesiyai i niya tovibwanaose nakanakasisi nenesiyai Yeisu kana viwaifufuna fasinei. ¹¹ Tovanama si nowaniya sebobo i tewesafusiya eketa yasi bwadudabadaba si veniya si bwaduwa, “Gabana kana veniwa” eketa Yudasa ketaketa i nuwasa be nimasiyai ina teniya.

*Yeisu Yana Tonowana Nukusi
Venuvisinatana Kana Ka Si Fufuniya
Madiu 26:17-25, Nuke 22:7-14,21-23, Yoni 13:21-30*

¹² Maneka Muka Nakana Nutuva Kana Ka kana kuyadayada kafa viuğu nenei, sifi mwanaavausi si munumunuwa Venuvisinatana Kana Ka fasinei. Na kuyadayadanama nenei Yeisu kana tomuniyeina si nutoninuvenuveiya si bwaduwa, “Namao nuwanuwau Venuvisinatana Kana Ka kata gidewadewai fasiweu?”

¹³ Eketa kana tomuniyeina nasi nuwa i iyavisiya i bwaduwa, “Kwana kanasuna Yenusanema keta namoğä tamokağä tukwawa na ukowina i uniuniya ina nisaimiya. Na gwadinama kwana muniyi, ¹⁴ eketa avi numai ina kanasuna, toninuma kwana iyaviya kwana bwaduwa, “Tovisawavenena

i bwaduwa, “Nama totomunama nenei kaku tomuniyeina nukusi Venuvisinatana Kana Ka kata kawiyei?”’ ¹⁵ Eketa totomu nakasina gigidewadewana kuetana ina visawavenimiya. Nokomai iba matatafunu kwana gidewadewiya fasitiyai.”

¹⁶ Yeisu kana tomuniyeina si nōgokawawa eketa si niya Yenusanema avana Yeisu i iyavisiya maisemoka i kikinomana keta si gidewadewa Venuvisinatana Kana Ka fasinei.

¹⁷ Tovanama i vimatasisinovanovana Yeisu yana tonowana kasi 12 nukusi si kikinomana.

¹⁸ Sonamai si kakawa atu Yeisu i bwaduwa, “A iyaiyavimiya venemokena, namōga tamokāga sinemiyai ina viwaifufunikuwa, namōganama nukusi ta kakawa.”

¹⁹ Nuwatasi i dauna eketa tamokatamokāga si iyaviya, “A sanamanikuwa iyau muka.”

²⁰ I iyavisiya i bwaduwa, “Kami 12 sinemiyai aitevana kana maneka Iyau nukusi kabomai ina kutuviya, na tana namōganama. ²¹ Namōga Natuna ina mateya naki Guyau fonakituna i bwaduwa maisemoka, eatu aitevana Namōga Natuna i viwaifufuniya nao daunina venemokena ina nisaiya. Kana nufotamoka be ayona muka sita vinatunei.”

²² Tovanama si kakawa nenei, Yeisu maneka i viya eketa i kawanunuku-viagigikuwa. Eketa i gisiniya eyo kana tomuniyeina i venisiya keta i bwaduwa, “Kwa vai, nofe o tofwaku.”

²³ Yota owa i viya keta Guyau nenei i viagigikuwa eyo i venisiya eketa owanama nenei si yuwa.

24 Eketa i iyavisiya i bwaduwa, “Nofe o ufaufaku, yawane ina ketosiwaġa namoġa yagwanisi fasisiyai keta Guyau yana dedeni kwami nukusi ina givifikiniya. **25** A iyaiyavimiya venemokena, muka tamo nofemaise waininama ana yunuvanuvai kana nivaniva Guyau yana kafa visime nenei waini kiouna ana yumiya.”

26 Eyo si osedavadava muniyai yo si kikinomana keta si niya koya Onive nenei.

Yeisu I Bwaduvioġoniya Fita Yana Vikewa

Madiu 26:31-35, Nuke 22:31-34, Yoni 13:36-38

27 Yeisu i iyavisiya i bwaduwa, “Matatafumokemi kwana butuwa atu kwana sinanovikuwa uġuna Guyau fonakituna viviginiwina i bwaduwa,

*‘Tokitavikavina ana nuvimatiya
keta sifi sina venusavaneneġa.’*

28 Atu tovanama mateyai ana misini-savavinikuwa, ana viketanuna Ganini.”

29 Atu Fita i iyaviya i bwaduwa, “Yawane sabu matatafusi sina butuwa atu iyau o muka.”

30 Eketa Yeisu Fita i iyaviya i bwaduwa, “A iyaiyaviwa venemokena, kimoki nuwabunanama nenei kuna vikeweikuwa kawa tonu muniyai yo kamukamu yana kuae ina vinuwiya.”

31 Atu Fita i kawafatafata i bwaduwa, “Na namaise taki fasiweu sina nuvimatikuwa, eatu muka tamo kana fata be ana bwadu, ‘Muka

ata sanamanei.’” Eketa tomuniyeina matatafusi tamoka bwadunama yota si bwaduwuya.

*Yeisu I Kawanunukuwa Getesemani Nenei
Madiu 26:36-46, Nuke 22:39-46*

³² Yeisu kana tomuniyeina nukusi si nemiya kabāga kana wava Getesemani nenei keta i iyavisiya i bwaduwa, “Nofemai kwana fakwafakwa eatu ana kawanunukuwa.” ³³ Eketa Fita, Yemesa keta Yoni i ovisiya keta nukusi si niya. Tovanama nenei kana nutoḡona i weifanufanuya, ³⁴ eketa i iyavisiya i bwaduwa, “Nuwatadauna nakatamokena i munumunukuwa keta katekateku i nunubudabudaniya maise mate. Nofemai kwana fakwafakwa eatu kwana tonetoneya.”

³⁵ Kabegomokena i vaniya, eyo i fekuwa fwayafwayai keta i kawanunukuwa be taki kana fata maise kuvavana kana kawasasa ita niuniya. ³⁶ I bwaduwa, “Amaku, iba matatafuna ka fata, na fasinei kuvavana nofe owana ku viteweyei nenekuwai. Eatu muka yaku nuwanuwa atu avana ku nuwenuwiya maise kuna fufuniya.”

³⁷ I makaviniya kana tomuniyeina kasi tonu nenesiyai atu i nisaisiya si banubanuwa eketa Fita i iyaviya i bwaduwa, “Saimoni, omasi ku banubanuwa. Muka kana fata be matau ina fakina kawasasa bwatanaḡa?” ³⁸ Eketa i iyavisiya i bwaduwa, “Kwana tonetoneya keta kwana kawakawanunukuwa ebe kami anuwanuva nenei muka kwana feku. Yami viṇuwadadana avana dewadewasi katekatemiyi kwana savivinisiya o fifiwanisi atu tofwami i seḡakamekameya.”

³⁹ I makaviniya i kawanunukuwa keta tamoka bwadubwadusima nenesiyai i kawanunukuwa.

40 I makavina-savaviniya nenesiyai eatu i nisaisiya yota si banubanuwa, uguna matasi naki i goyomoka. Eketa bwadusi si bauwiya.

41 Tovanama kana vitonu i makavina-savaviniya nenesiyai, i iyavisiya i bwaduwa, “Omasi yawane kwa banubanuwa keta kwa viviyawasiya. Nakiyi. Tova naki i nuvifotiya. Toviwaifufuna Namōga Natuna kabegomokena be togo'yna nimasiyai ina teniya. **42** Ake, kaku toviwaifufunamokena naki i kikinomana. Kwa misini be ta nai.”

Yeisu Si Givikaviniya

Madiu 26:47-56, Nuke 22:47-53, Yoni 18:3-12

43 Yeisu yawane i nunusifufuwa atu Yudasa tanake tamokaǵa tonowana kasi 12 i venukikinomana. Tovibwanaose nakanakasisi keta visime kana tovisawavenena yota tokawakawa sabuveka si visimeisiya, keta na fetosi yota na funumisi Yudasa si vinuwiya keta nukusi si nemiya. **44** Toviwaifufunanaama kiyakiyaya tamokaǵa i mikigisawakedanisiya, “Namōganama ana viyuiya na tanake kwana givikaviniya eketa kwana niiya.”

45 Tovanama si kikinomana Yudasa i niya Yeisu nenei keta i bwaduwa, “Tovisawavenena!” Eyo navanavanei i viyuiya. **46** Eketa Yeisu tofwanei si ova keta si givikaviniya. **47** Atu namōga tamokaǵa nokomai i misimisiniya yana feto i soniyaginiya keta tovibwanaose kasi toviketanuneina kana kaetoga taniyana i nuonosiya.

48 Yeisu i iyavisiya i bwaduwa, “Omasi na fetomi keta na yami funuma kwa nemiya be kwana givikaviniwu vitana tamо togikuma

maise? ⁴⁹ Iyau tova nubwayouna Numa Kodukodu kumenanina kana wasiketai nukusi ta fakwafakwa eatu a gigisawakedana namōga nenesiyai eatu ava ūguna yo muka kwata givikaviniku? Eatu nakiyai, ebe avana Guyau fonakituna i bwaduwiya, ina vivenemokena.” ⁵⁰ Eyo kana tomuniyeina matatafusi si butuwa atu Yeisu si sinanoviya.

⁵¹ Tufunakata tamokāga o nuyāga tofwanei i sinawaminiya keta Yeisu i muniiya. Tanake yota si anuvanuva be sita givikaviniya, ⁵² eava kana nuyāga si sinayauya atu gonegonena i dibwana.

Yeisu Si Nutoninuvevneiya

Madiu 26:57-68, Nuke 22:54-55,63-71, Yoni 18:13-14,19-24

⁵³ Namōga sabu Yeisu si niiya tovibwanaose kasi toviketanuneina yana numai. Nokomai tovibwanaose nakanakasisi matatafusi keta tokawakawa yota visime kana tovisawavenena si yokowa. ⁵⁴ Fita i muniiya simokāga sasanei keta i niya tovibwanaose kasi toviketanuneina yana numa kana wasiketai. Nokomai i nuvitoiya tuiyo nukusi keta kaiyai i vivikivanavana.

⁵⁵ Tovibwanaose nakanakasisi keta Diu Kawakawa matatafumokesi si nuwasa Yeisu kana tokanakakikakina ebe yo sina nuvimatiya. Atu muka tamo sita nisāgai. ⁵⁶ Tokanakakikakina-vikanonono yagwanisi o si bwaduwa Yeisu fasinei atu yasi sifufumokesi muka tamo ita nuvifotei.

⁵⁷ Namōga tunisi si misiniya eketa nofemaise Yeisu fasinei si bwadu-vikanononowa, ⁵⁸ “Ka nowaniya i bwaduwa, ‘Namai Numa

Kodukodu namōga nimasiyai si yoniya o ana yakweniya atu kuyadayada tonusi nenei ana yona-savaviniya muka namōga nimasiyai.”
59 Eatu muka tamo yasi sifufunama tamo ita nuvifotei.

60 Eketa tovibwanaose kasi toviketanuneina sabu matasiyai i otowamisiniya keta Yeisu i nutoninuveviya i bwaduwa, “Yasi vinoisima fasinei tamo avana kuna bwaduwuya o muka?”

61 Atu Yeisu muka tamo avana ita bwaduwei naki i manava. Tovibwanaose kasi toviketanuneina yota i nutoninuveviya i bwaduwa, “O venemokena kwāga Togifafafana Gigibokeinana, Guyau ta sawadavadaviya kwāga Natuna?”

62 Yeisu i bwaduwa, “Ika Iyau. Yawane matatafumi kwana kitiya Namōga Natuna ina fakwasiotoga Tofiwanaonaona kikikatainei keta abamei busibusi nenei ina nenemiya.”

63 Tovibwanaose kasi toviketanuneina kana nuya i kiganiniya* keta i bwaduwa, “Muka yota tana vinuwadadana tokanakakikakina fasisiyai.
64 Yana bwadu-tafakaikokona Guyau nenei naki kwa nowaniya eketa namaise kwata bwadu?”

Eketa matatafusi si bwaduwa, “I goyona na fasinei kana nufota be ina mateya.”

65 Tunisi si vibutuwa si nufunataniya. Matana si sumiya eyo si munuya atu si bwaduwa, “Taki kwāga Guyau yana tomatakawa, ku iyaveiki aitevana i munuu!” Eyo tuiyo si givikaviniya eketa si munuya.

Fita Yeisu I Vikeweiya

Madiu 26:69-75, Nuke 22:56-62, Yoni 18:15-18,25-27

⁶⁶ Fita yawane wasiketai i fakwafakwa atu tovib-wanaose kasi toviketanuneina kana kaetōga gu-mayogu i nemiya. ⁶⁷ Tovanama i kitia Fita kaiyai i vivikivanavana, i toneye-dewadewiya keta i bwaduwa, “Kwāga o noko namōganama Yeisu tene Nasaneti nukusi.”

⁶⁸ Eatu Fita i vikewa i bwaduwa, “Iyau muka ata sanamanei ava fasinei ku bwadubwadu,” keta i kikinomana kawa nenei. Tovanama nenei kamukamu i kwaeya.

⁶⁹ Tamoka gumayogunama yota Fita i kitasavaviniya, keta aviyaonana namōga nokomai si misimisiniya i iyavisiya i bwaduwa, “Nofe tanake Yeisu unana tamokāga!” ⁷⁰ Eatu Fita yota i vikewavaviniya.

Muniyai aviyaonana namōga nokomai si misimisiniya Fita si iyaviya si bwaduwa, “Bwadu venemokena, kwāga o unasi tamokāga ūguna kwāga yota tene Ganini.”

⁷¹ Atu Fita i vikewatautauna i bwaduwa, “Guyau matanei a iyaiyavimiya venemokena! Namōganama kwa bwadubwaduwia o muka ata sanamanei.”

⁷² Tovanama nenei kamukamu yana kuae i vinuwiya eketa Fita nuwatana i kakwaniya Yeisu yana bwadu, “Kuna vikeweikuwa kawa tonu muniyai yo kamukamu yana kuae ina vinuwiya.” Eketa i kafuwaiya keta i bwediya.

Yeisu Fainato Naunei I Misiniya

Madiu 27:1-2,11-14, Nuke 23:1-5, Yoni 18:28-38

¹ Nuwabunimokeyai tovibwanaose nakanakasisi be tokawakawa yota visime kana tovisawavena keta Diu Kawakawa matatafusi si yokowa keta si vikanusifusifufuwa Yeisu fasinei. Eyo nimana si kiyona keta si niiya Noma tovisime Fainato nimanei si teniya. ² Eketa Fainato Yeisu i nutoninuvenuveiya i bwaduwa, “O kwaǵa fiyao Diu yasi Tuformu?”

Eketa Yeisu i nufata i bwaduwa, “Ika. Na naki ku bwaduwa maise.”

³ Eketa tovibwanaose nakanakasisi Yeisu si vinoiya iba yagwanisi goyosi fasisiyai. ⁴ Yota Fainato Yeisu i nutoninuvenuveiya i bwaduwa, “Tamo avana kuna bwaduwiya o muka? Ku kitai goyonan kana yagwana fasinei si vivinoiwa!” ⁵ Atu Yeisu muka tamo avana ita bwaduwei eketa Fainato i mayaǵa.

Fiyao Diu Nuwanuwasi Yeisu Ina Mateya

Madiu 27:15-26, Nuke 23:13-25, Yoni 18:39 — 19:16

⁶ Manamana tamokatamokaǵa Venuvisinatana kana Ka kana tovai, tova matatafunaa Fainato finisina tamokaǵa deniyai i vivikikinomaniya namoǵa yasi nuwanuwai maise. ⁷ Na tovanama nenei namoǵa kana wava Banabasi o deniyai i fakwafakwa. Tanake o tunisi tovigwaeǵa nukusi Noma gabemani nukusi si vigwaeǵa, keta yota tunisi namoǵakaokaoǵosi atu si nuvimatisiya. Eketa Noma tonuaviya si givikaviniya keta deniyai si teniya. ⁸ Sabuveka si yokowa keta Fainato

si vikokoniya be tamo aitevana ita ketoyauya, naki manamana tamokatamokaǵa i fufuniya maise.

9 Eketa Fainato i nutoninuvenuveisiya i bwaduwa, “Omasi nuwanuwami fiyao Diu yami Tufomu ana ketoyauya fasimiyai?” **10** Nofemaise i iyavisiya uǵuna waniya i mikisanamaniya vitana tovibwanaose nakanakasisi o Yeisu si vikumaiǵiya, na fasinei si katuteweiya nenei. **11** Eatu tovibwanaose nakanakasisi o sabuveka si ketoyakayakanisiya be Fainato sina vikokoniya be Banabasi ina ketoyauya fasisiyai atu muka Yeisu. **12** Atu Fainato i iyave-savavinisiya i bwaduwa, “Atu namoǵa nofe kwa weneweniya Diu yami Tufomu o namaise ana iyavei?”

13 Si vikafinafina si bwaduwa, “Ku giviogonaǵanaǵai!”

14 Atu Fainato i iyave-savavinisiya i bwaduwa, “Atu avao uǵuna? Avi goyona i fufuniya yoke?”

Atu si finadewadewa si bwaduwa, “Ku giviogonaǵanaǵai!”

15 Eketa namoǵa nuwatasi kana kata fasinei, Banabasi i ketoyauya atu tonuaviya i visimeisiya keta Yeisu si nafanafasiya eyo i katuteweiya be sina giviogonaǵanaiya.

Tonuaviya Yeisu Si Sawaviniyya

Madiu 27:27-31, Yoni 19:2-3

16 Tonuaviya Yeisu si niiya Fainato yana numa kaikaiwabuna kana wasiketai eyo unaunasi si wenevakukusisiya. **17** Kwame yabeyabenina Yeisu si viktoniya keta kisisiku naǵanina kikikwanekwanena nenei gedugedu si fufuniya keta debabounei si teniya. **18** Keta si sawaviniyya si bwaduwa, “Ae mukanono. Naki Diu yasi

Tufomu!" **19** Kiwanai si munumunuya be si nufunataniya eatu naunei vifotuwai kaetutusi si viketogunisiya vitana kana venufotafota tufomu maise. **20** Si sawaviniiya muninei, kwame yabeyabenina si visaniniiya eatu Yeisu tauna kana nuya si vikotoniya eketa si oviya si kikinomaniya menanai be sina giviogonağanaiya.

Yeisu Si Giviogonağanaiya

Madiu 27:32-44, Nuke 23:26-43, Yoni 19:17-27

21 Si niniya atu ke'ta tofwanei namoğga tamokağga Saimoni tene Sainini si venusaiya kawayavatei i nemiya. Tanake Anekisenida keta Nufusi amasi. Namoğanama si nuyakayakanaya keta Yeisu kana ogonağanaga i uniya. **22** Yeisu si oviya keta si niiya kabaga kana wava Gonigota nenei. Gonigota kana nuwanuwa o Navakanuwa kana Kabağga. **23** Nokomai bubu kana wava meya, waini nukusi si viniya eketa Yeisu si venenuvanuviya eatu i dibutoyoiya.* **24** Eketa si giviogonağanaiya atu kana nuya fasinei, nao daisi nenei si vikaneeneiya. Nofe ketaketanama nenei, kana nuya si vitukuwiya tututausi nenesiyai.

25 Nuwabuni 9 kanafafani nenei Yeisu si giviogonağanaiya. **26** Kana bwaduvinoi viviginiwina si tutuvifotiya kuetana i bwadubwaduwa, TANAKE DIU YASI TUFO MU. **27** Togikuma nasi nuwa Yeisu nukusi si giviogonağanaisiya, tamokağga

* **15:21** Noma 16:13 **15:23** Waini keta meya nukusi si viniya o kuvalvana kana kafa nuditutuma. **15:24** Same 22:18 **15:27** Aiseya 53:12

kukikikatainei eatu tamokaāga o kukikimawanei.†

²⁹ Namōga sabu ketai si niniya be si nenemiya eatu si nunuwautuutuna atu si bwadubwaduwa, “Ake, naki ku sanamaniya! Omasi Numa Kodukodu kuta yakweniya eatu kuyadayada tonusi nenei kuta yonavaviniya, mukanono! ³⁰ Make nao ogonaāganāga nenei ku sobunemai be taugu ku gifafafaneu!”

³¹ Tamoka ketaketanama nenei tovibwanaose nakanaākasisi keta visime kana tovisawavenena tututausi nenesiyai Yeisu fasinei si sawaviniāga si bwaduwa, “Mani namōga i gifafafanisiya atu tauna o muka kana fata! ³² I bwaduwa avage tana Togifafafana Gigibokeinana keta yota Isineni kana tufomu. Make nao ogonaāganāgai ita sobunemiyata kitiya be tata vitumaāganiya.” Namōga kasi nuwa o kuniniuna si giviogonaāganaisiya yota si sawanuketuwiya.

Yeisu Yana Mate

Madiu 27:45-56, Nuke 23:44-49, Yoni 19:28-30

³³ Tovanama vanavana i nemiya sinefounei, noko fafaninama matatafunu kumanovana i gikafufuya keta i fakwa kana nivaniva vanavana i niya tonusi yana fafani. ³⁴ Tovanama nenei Yeisu kayona nakasinei i bwauwa i bwaduwa, “Enoi, Enoi, nama sabatani?” Kana givina o, “Yaku Guyau, yaku Guyau, ava uāguna ku sinanoveiku?”

³⁵ Namōga tunisi nokomai si misimisiniya si nowaniya keta si bwaduwa, “Kwa vaneneāga, kana kita kamo Inaitiya i weneweniya.”

† **15:27** Tunisi viginiwa nenesiyai o kana nukisi 28 si nunatuya. Eketa Guyau fonakituna i vivenemokena bwadu noko, “Aviyaonana totaniyagunu sinesiyai tanake na kana sawasawa.” **15:29** Same 22:7, 109:25, Maka 14:58, Yoni 2:19 **15:34** Same 22:1

36 Namoḡa tamokaḡa i dibwana i niya eketa banou i viketokutuviya waini yuyuna nenei. Eyo kiwana bwatanei i tunevaneiya be Yeisu ina yumiya fasinei eketa i bwaduwa, “Yabe ta kitai, kamo Inaitiya ina nemiya ogonaḡanaḡai ina kakiya.”

37 Eatu Yeisu kayona nakasinei i bwauwa eketa yawasina i kakaviya. **38** Eketa Numa Kodukodu kusinena kafa dawanafafana kana nuya i kasaniniya etanei atu i sobuwa sifunei.

39 Tonuaviya kasi kaimatana ogonaḡanaḡa naunie i misimisiniya i kitiya namaise Yeisu i mateya eketa i bwaduwa, “Bwadu venemokena namoḡa nofe o Guyau Natuna.”

40 Tunisi vivine o matakedawanauna si misiniya atu si tonetoneiya. Sinesiyai o Meni ne Magidana eketa Sanome yota venuwana Meni o Yemesa gwadiyei keta Yosese ayosi. **41** Nofe vivinesima o nauna Yeisu Ganini nenei si muniiya keta yota si okakikakiniya. Vivine yota yagwanisi nukusi nokomai si misiniya atu Yeisu si tonetoneiya. Vivinesima o Yeisu kaena si kwafuya eketa si niya Yenusanema.

Yeisu Kana Odewadewa

Madiu 27:57-61, Nuke 23:50-56, Yoni 19:38-42

42-43 Tene Animatiya kana wava Yosefa o tanake Diu Kawakawa tamo kana namoḡa nakasina. Tanake o i kitakitanufota Guyau yana kafa visime fasinei. Eketa gidewadewa kana kuyadayada atu naki i vivinavinaviya be yo Sabati ina vibutuwa fasinei, eketa Yosefa na yana katevatu i niya Fainato nenei keta i vikokona Yeisu tofwana

fasinei. ⁴⁴ Fainato i sabanutuġa tovanama Yeisu yana mate fasinei i biganowana keta tonuaviya kasi kaimatana i weniya keta i nutoninuveviya taki Yeisu naki i mateya. ⁴⁵ Tovanama kaimatana nenei sanamana i videwadewiya, tofwa i sawateweiya Yosefa nenei.

⁴⁶ Yosefa nuya kwayakwayana i kimwaniya eketa tofwa ogonaġaġai i kakiya keta i waminiya muniyai yo vatunuma vigabanina si taniya nenei i teniya. Eyo gabana nakasina i katubwatabwataviniya keta vatunuma kawana i teneftotiya. ⁴⁷ Meni ne Magidana keta Meni Yosese ayona o si kitiya namaniyei Yeisu tofwana i teniya.

16

*Yeisu Yana Misini-Savavineina
Madiu 28:1-8, Nuke 24:1-12, Yoni 20:1-10*

¹ Tovanama Sabati kana kuyadayada i kakaviya, Meni ne Magidana yota Meni Yemesa ayona keta Sanome bubu mamadisi si vikimwaneya Yeisu tofwana kana vitowa fasinei. ² Wiki kana kuyadayada kafa viuġu nenei tovanama vanavana i vaneya, si niya vatunuma nenei. ³ Si niniya atu ke'ta tofwanei tututausi si vikanunutoniya si bwaduwa, “Aitevana gabana ina katuniyei vatunuma kawana nenei fasityai?”

⁴ Gabananama nakatamokena atu i kabwatabwataviniya i makaviniya eketa tovanama matasi i kanakasiya si kitiya kawa kakayauna. ⁵ Eketa vatunuma sinenei si kanasuna, tamokaġa tufunakata kana nuya kwayakwayana kukikikataisi si kitiya i fakwafakwa eketa si mayaġa. ⁶ Eatu i iyavisiya i bwaduwa, “Muka

kwana matuta. A sanamaniya Yeisu tene Nasaneti si giviogonağanaiya kwa nunuwasiya eatu tanake weka muka. Tanake naki i misini-savaviniya. Kwa kitai, nofemai si teniya.⁷ Atu kwana niya kana tomuniyeina keta Fita nukusi nofemaise kwana iyavisiya kwana bwaduwa, ‘Tanake i viviketanuna Ganini eketa nokomai yo kwana kitia. Naki nauna i iyavimiya maise.’ ”

⁸ Tovanama nokomaise si nowaniya, vivinesima si mayağā keta na yasi akikinikuna vatumuna sinenei si kikinomana-nemiya keta si vikadibwadibwana si niya. Si matuta eketa muka tamo aitevana sita iyavei avana namoğā tufunakasina i nusifufuwisiya.

[Tunisi Naumokena Viginiwa Muka
Sita Katukanasunei 16:9-20.]

*Yeisu I Kikinomana Meni Ne Magidana Nenei
Madiu 28:9-10, Yoni 20:11-18*

[⁹ Wiki kana kuyadayada kafa viuğu nenei tovanama Yeisu nuwabunimokeyai i misini-savaviniya, nauna Meni ne Magidana nenei i mikikikinomana. Nofe gumayogunama nenei Yeisu kanunu goyosi kasi ⁷ i nukakisiya.
¹⁰ Aviyaonana namoğā Yeisu nukusi si nidadana o nuwatasi i dauna eketa Yeisu fasinei si bwedibwediya. ¹¹ Atu Meni i niya keta i iyavisiya i bwaduwa, “Ei! Yeisu naki i misini-savaviniya, iyu tauku matamokekuwai a kitiya!” Eatu yana bwadu muka sita vitumağanei.

Yeisu Kana Tomuniyeina Kasi Nuwa Nenesiyai
I Nikikinomana
Nuke 24:13-35

12 Munifotai tomuniyeina kasi nuwa Yenusanema si teweiya keta si niniya atu Yeisu i nikikinomana nenesiyai. Si kitiya vitana tamo avi namōga.
13 Si makavinisiya keta unaunasi kasi tufo si iyavisiya atu tasike yota muka sita vitumāganeisi.

Yeisu Yana Tonowana Kasi 11 Nenesiyai
I Nikikinomana
Madiu 28:16-20, Nuke 24:36-49, Yoni 20:19-23,
Bunanige 1:6-8

14 Munifotai tonowana kasi 11 si kakawa eatu Yeisu i kikinomanisiya. Keta i dageisiya ūguna katekatesi yana gua eketa muka na yasi vitumāgana, na nenei aviyaonana yana misini-savavineina muninei si kitiya muka sita vitumāganeisi.

15 Eketa i iyavisiya i bwaduwa, “Kwana kikinomana fwayafwaya kana matatafu nenei be biga dewadewana kwana yauniya matatafusi nenesiyai. **16** Aitevana ina vitumāganikuwa keta givibutabuta ina viya nao gifafafana ina nisaiya, eatu aitevana muka ina vitumāganeiku nao vimatadawana ina nisaiya. **17** Kaku tovitumāgana kiyakiyaya kafa nuwatabau fifiwanisi sina savivinisiya. Kaku wavai kanunu goyosi namōga nenesiyai sina nukakisiya yota meya kiouzi tunisitunisi muka kasi sanamana nenesiyai sina nusifufuwa. **18** Mwata goyosi sina givikavina yota taki ukowa onaonasi sina yumiya, muka ina navisi. Nimasi sina dawana tovisafwavinagā tofwasiyai eketa sina bwina.”

Maka 16:19

xc

Maka 16:20

*Yeisu Yana Vane Abamai
Nuke 24:50-53, Bunanige 1:9-11*

19 Tovanama Tuveka Yeisu i nusifufukoōga, Guyau i vaneiya abamai eketa kikikatainei vifotu kabaina nenei i fakwasiotoga. 20 Eketa tomuniyeina si numamananiya namoōga nenesiyai. Eatu Tuveka i ovivitisoya eketa yana fiwanai kiyakiyaya kafa nuwatabau si savivinisiya namoōga matasiyai. Nofe ibasima nenesiyai yasi numamana i vivenemokena.]

**Buk Baibel long Kaninuwa
Portions of the Holy Bible in the Kaninuwa language of
Papua New Guinea
Buk Baibel long tokples Kaninuwa long Niugini**

copyright © 2016 Wycliffe Bible Translators, Inc.

Language: Kaninuwa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-04-13

PDF generated using Haiola and XeLaTeX on 11 Nov 2022 from source files
dated 9 Oct 2020

4bd5ff25-b536-53c8-9426-bc0ecd08c86d